


T CHL 2720-1132

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

SEP 20 1982



明史彙

本紀第六

光祿大夫 經筵講官明史總裁戶部尚書加七級臣王鴻緒奉

敕編撰

仁宗

哈佛大學
圖書館
珍藏印

仁宗敬天體道純誠至德弘文欽武章聖達孝昭皇帝諱高熾成祖長子也母仁孝文皇后夢冠冕執圭者上謁寤而生帝自幼端重沈靜言動有經稍長習射發無不中然非所好獨好學問日從儒臣論說不厭洪武二十八年閏九月冊為燕世子太祖嘗召秦晉燕周四世子親教之命分闕皇城衛士而還奏獨後問之對曰且寒甚士方食須食已後闕太祖善之又命分闕章奏獨取切軍民利病者白之其間文字或

繆置不以白太祖指示之曰兒忽之耶對曰不敢忽以爲小過不足瀆大聽耳太祖嘗問堯九年水湯七年旱民何所恃對曰恃聖人有恤民之政太祖益善之及成祖舉兵靖難令世子居守北平李景隆以數十萬衆圍城攻甚急城中老弱僅萬人世子日夜拊循吏士堅守以待救成祖自大寧還擊破景隆軍北平乃安時郡王高煦數從軍出高燧留佐居守宦寺黃儼者陰爲高燧謀奪嫡數使其黨譖世子將以北平應朝廷成祖以問高煦煦言世子自太祖時果與太孫厚善會朝廷用方孝孺策遣使致密書欲間燕父子世子得書不啓械其使致軍前而儼已潛使馳報成祖曰世子與中朝通使者至矣無何世子所遣使亦至成祖發書視之歎曰吾父

子至愛尙見讒間況君臣耶或問世子亦知有讒人乎曰不知也吾知盡子職而已成祖旣卽尊位以北平爲北京仍命居守永樂二年二月召至京立爲皇太子成祖數北征命之監國裁決庶政四方水旱饑饉輒遣賑恤仁問大著而高煦高燧之黨讒構未已十五年高煦以罪徙樂安明年黃儼等復譖太子擅赦罪人成祖遣侍郎胡濙往察之濙密疏太子誠敬孝謹七事以聞成祖意乃解其後儼等僞撰遺詔謀立高燧事覺儼等伏誅高燧以太子力救得免二十二年秋七月辛卯成祖崩於榆木川八月甲辰傳遺詔至太子遣太孫迎喪開平丁未釋夏原吉吳中黃淮楊溥於獄丁巳卽皇帝位大赦天下以明年爲洪熙元年罷西洋寶船迤西市馬雲

南交趾採辦諸役戊午復夏原吉吳中官巳未武安侯鄭亨
鎮大同保定侯孟瑛鎮交趾襄城伯李隆鎮山海武進伯朱
榮鎮遼東復置三公三孤官以公侯伯尙書兼之進楊榮爲
太常寺卿金幼孜爲戶部右侍郎兼大學士如故楊士奇爲
禮部左侍郎兼華蓋殿大學士黃淮爲通政使兼武英殿大
學士俱掌內制辛酉鎮遠侯顧興祖充總兵官討廣西叛蠻
甲子汰冗官乙丑召漢王高煦赴京戊辰官吏謫隸兵籍者
放還鄉九月癸酉交趾指揮方政率兵捕賊爲黎利所敗指
揮同知伍雲死之丙子召工部尙書黃福於交趾命兵部尙
書陳洽代掌布按二司事庚辰河溢開封免今年田租仍命
右都御史王彰往撫恤之召韓王沖熾襄陵王沖烱樂平王

沖熒赴京壬午諭工部古者任土作貢不強所無比年如丹
漆石青之類所司不究物產之地槩徵郡縣科派病民自今
官所用物必於所產地計直市之違者罪不宥乙酉增諸王
歲祿鎮守交趾中官山壽請授黎利清化知府從之仍諭令
自新丁亥漢王高煦還藩黎利犯清化指揮同知陳忠戰沒
戊子襄城伯李隆守備南京勲臣守備南京自此始乙未散
太僕馬於諸衛所收養母獨煩畿民丁酉太常寺卿兼文淵
閣大學士楊榮兼謹身殿大學士戶部右侍郎兼文淵閣大
學士金幼孜兼武英殿大學士戊戌賜少傅兼吏部尙書蹇
義少保兼華蓋殿大學士楊士奇太子少傅兼謹身殿大學
士楊榮太子少保兼武英殿大學士金幼孜銀章各一曰繩

愆糾繆諭以協心贊務凡政事有闕或羣臣言而未從者用此印密疏以聞冬十月癸卯詔天下都司衛所修治城池甲辰賜衍聖公孔彥縉宅於京師乙巳復徐欽魏國公爵戊申通政司請以四方雨澤章奏送給事中收貯帝曰祖宗欲施恤民政故令奏雨澤乃積於通政司既失之矣轉送收貯是欲上之人終不知也自今奏至卽封進朕親覽焉巴西冊妃張氏爲皇后壬子立長子瞻基爲皇太子封諸子瞻埈爲鄭王瞻墉越王瞻墀襄王瞻垺荆王瞻輿淮王瞻埜滕王瞻埶梁王瞻埏衛王乙卯詔在京七品在外五品以上官及知縣各舉賢才非其人者坐之丁巳命楊士奇楊榮金幼孜會五府九卿六科錄囚於承天門歲以爲常戊午免遠安王貴燮

巴東王貴煊爲庶人已未遷岷王府於武崗州庚申增在京官及軍士月廩乙丑除渾源州逃戶租籍有司請均諸民帝曰民窮故逃今欲均之是又驅之逃也其除之丁卯擢監生徐永潛等二十人爲給事中十一月壬申詔禮部建文諸臣家屬在教坊司錦衣衛浣衣局及習匠功臣家爲奴者悉宥爲民還其田土言事謫戍者亦如之癸酉詔有司條政令之不便者其被災不請恤者罪之甲戌詔羣臣極言時政闕失阿魯台貢馬遣使宥其罪乙亥諭兀良哈命近畿官軍更番詣京操練丙子遣御史巡察邊衛癸未遣御史分巡天下考察官吏甲申平陽王美圭來朝丙戌進蹇義少師楊士奇少傅太子少傅戶部尙書夏原吉少保賜繩愆糾繆銀章諭勉

如義士奇等丁亥諭楊士奇楊榮金幼孜日卿三人及蹇夏兩尚書皆先帝親任舊臣朕方倚以自輔所行有未善者皆當盡言庚寅勅諸將防邊丁酉召華陽王悅耀赴京庚子河溢永城十二月壬寅平陽王美圭還藩癸卯詔建文朝諸臣外親戍邊者留一人戍所餘悉放還詔天下田被災者悉除其租庚申葬文皇帝於長陵乙丑命韓王沖烱襄陵王沖炆樂平王沖炆之藩平涼丙寅顧興祖破平樂潯州蠻丁卯漢世子瞻坦濟陽王瞻奎臨淄王瞻域昌樂王瞻埤淄川王瞻學齊東王瞻坪來朝是年朝鮮于闐琉球占城哈密古麻喇滿刺加蘇祿瓦刺俱入貢

洪熙元年春正月壬申朔御奉天門受朝不舉樂甲戌南京

龍山產芝禮官請表賀不許己卯享太廟建弘文閣擇儒臣入直學士楊溥掌閣事辛巳漢世子瞻坦濟陽王瞻奎臨淄王瞻域昌樂王瞻埤淄川王瞻學齊東王瞻坪辭歸癸未以時雪不降勅羣臣修省丙戌大祀天地於南郊奉太祖太宗竝配遂加恩天下壬辰朝臣予告歸省者賜鈔有差著爲令己亥遣布政使周幹按察使胡槩參政葉春巡視南畿浙江二月辛丑遣使封琉球世子尙巴志爲王壬寅飭邊防戊申祭社稷奉太祖太宗竝配乙卯以卽位遣官祭祖陵皇陵孝陵歷代帝王陵嶽鎮海瀆丙辰耕藉田甲子廣西蠻平丙寅奉皇考妣神主祔廟是月南京地震凡六三月壬申前光祿署丞權謹以孝行擢爲文華殿大學士甲戌賜先朝大臣金

忠馬京墨麟王鍾鄭賜儀智盧淵陳壽朱濬等九人贈官予
諡許思溫楊泰孫瑜成璉盧祥鄭剛康汝楫賀銀張執中等
九人贈官丁丑詔求直言戊子隆平饑有司請以官麥貸之
帝曰饑卽賑之不必曰貸己丑詔曰刑者禁暴止邪道民於
善非務殺也吏或深文比附朕甚憫之自今有犯死罪律應
凌遲者依律科決其餘死罪止於斬絞法司勿得傳會以致
冤濫或朕一時過於嫉惡律外用籍沒及凌遲刑者法司再
三執奏五奏不允同三公大臣執奏必允乃己永爲定制文
武諸司毋得鞭人背尤不許加人宮刑有自宮者以不孝論
非謀反毋得用連坐法古之盛時采民言以資戒警今奸人
往往撫拾誣爲誹謗法吏鍛鍊成獄刑之失中民則無措今

後有告誹謗者一切勿治庚寅陽武侯薛祿率師巡邊辛卯
參將安平伯李安與榮昌伯陳智同掌交趾軍務壬辰貴州
總兵蕭綬討廣西蒙顧洞湖廣藍山賊及寧溪徭寇踰年平
之戊戌將還都南京詔北京諸司悉稱行在復設行部及行
後軍都督府是月南京地震凡十六夏四月壬寅帝聞山東
及淮徐民乏食有司徵夏稅方急乃御西角門召大學士楊
士奇草詔免今年夏稅及秋糧之半士奇言上恩至矣但須
戶工二部預聞帝曰救民之窮當如救焚拯溺不可遲疑有
司慮國用不足必持不決之意趣命中官具楮筆令士奇就
門樓書詔帝覽畢卽用璽付外行之顧士奇曰今可語部臣
矣設北京行都察院癸卯漢世子瞻坦臨淄王瞻域昌樂王

瞻埤淄川王瞻墀來朝尋辭歸戊申命華陽王悅耀居武崗州賑河南四州二十三縣饑庚戌科場分南北取壬子命皇太子居守南京戊午謁長陵己未還宮是月南京地震凡三五月辛未南京地震癸酉詔修太宗實錄己卯侍讀李時勉侍講羅汝敬以言事改御史尋下獄庚辰帝不豫遣中官海壽馳召皇太子辛巳疾大漸遺詔傳位皇太子是日崩於欽安殿年四十八七月己巳上尊諡廟號仁宗

明史藁

本紀第六終

明史藁

本紀第七

光祿大夫 經筵講官明史總裁戶部尚書加七級臣王鴻緒奉

敕編撰

宣宗

宣宗憲天崇道英明神聖欽文昭武寬仁純孝章皇帝諱瞻基仁宗長子也母孝誠昭皇后生帝時宮中光采騰耀先夕成祖夢太祖授以大圭曰傳之子孫永世其昌彌月成祖見之曰是兒英氣溢面符吾夢矣稍長嗜書智識傑出永樂五年出閣就學七年成祖幸北京從行道經田家令觀農具及其衣食作務本訓授之八年成祖征沙漠命留守北京九年十一月立為皇太孫始冠自後巡幸征討皆從十二年從征

瓦剌成祖語侍臣曰太孫聰睿過人今使躬歷行陣庶知將士勞苦又謂學士胡廣等曰軍中多暇卽於太孫前論說經史文事武備毋偏廢也仁宗卽位立爲皇太子洪熙元年夏四月以南京地屢震命太子往守甫至謁孝陵仁宗不豫以璽書馳召而從臣已得晏駕之信未敢以聞慮漢王有異謀請整兵衛間道行太子不可六月辛丑至良鄉聞遺詔入宮發喪庚戌卽皇帝位大赦天下以明年爲宣德元年辛亥諭邊將嚴守備甲寅趣中官在外採辦者還罷所市物秋七月乙亥尊皇后爲皇太后立妃胡氏爲皇后辛卯顧興祖討平大藤峽叛蠻乙未諭法司慎刑獄閏月乙丑楊溥還直文淵閣八月戊辰都指揮李英討安定曲先叛番大敗之安定王

桑兒加失夾等詣闕謝罪壬申詔內外羣臣舉廉潔公正堪牧民者癸未大理卿胡槩同參政葉春巡撫南畿浙江京省設巡撫自此始九月壬寅葬昭皇帝於獻陵冬十月戊子公侯伯五府六部大學士給事中審覆重囚著爲令十一月戊戌顧興祖討禽思恩叛蠻覃公新甲寅討殺覃公旺辛酉薛祿爲鎮朔大將軍率師巡邊十二月甲申顧興祖討平宜山叛蠻是年朝鮮哈密回回滿剌撒丁占城琉球中山瓜哇烏思藏瓦剌淳泥俱入貢

宣德元年春正月癸卯享太廟丁未大祀天地於南郊己未侍郎黃宗載等十五人清理天下軍伍其後遣京卿給事御史著爲令二月戊辰祭太社太稷自後太廟南郊太社太稷

帝皆躬祀歲以爲常丁丑耕藉田祭先農賜百官耆老宴於壇側丙戌謁長陵獻陵丁丑至自天壽山三月己亥征夷副將軍陳智方政討黎利於茶籠敗績又安知府琴彭死之癸丑行在禮部右侍郎張瑛爲左侍郎兼華蓋殿大學士直文淵閣夏四月乙丑成山侯王通爲征夷將軍充總兵官都督馬瑛爲參將率師討黎利安平伯李安掌交趾都司事陳智方政俱削爵充爲事官聽王通節制丙午瘞遺骸庚申召陽武侯薛祿還秋七月乙未免山東夏稅己亥諭六科凡中官傳旨必覆奏始行壬子罷湖廣採木八月壬戌漢王高煦反丙寅宥武臣罪非殊死者五百二十人復其官丁卯釋軍士徒罪以下令從軍己巳親征高煦鄭王瞻埈襄王瞻墿居守

大賚從征將士少師蹇義少傅楊士奇少保夏原吉太子少傅楊榮太常卿楊溥扈行辛未發京師辛巳至樂安帝兩遣書諭降又以勅繫矢射城中諭以禍福明日高煦出降樂安平癸未改曰武定州乙酉班師九月丙申至自武定州戊戌法司鞫高煦同謀者詞連晉王濟熿趙王高燧命勿問冬十月戊寅釋李時勉於獄復以爲侍讀十二月辛未錄囚乙酉黔國公沐晟爲征南將軍總兵官興安伯徐亨新安伯覃忠爲左右副總兵率師由雲南安遠侯柳升爲征虜副將軍保定伯梁銘爲左副總兵都督崔聚爲右參將率師由廣西分道並進會勦黎利兵部尚書李慶參贊軍務是年瓜哇暹羅琉球蘇門答刺滿刺加白葛達撒馬兒罕土魯番哈密烏思

藏俱入貢朝鮮使五至

二年春二月癸亥行在戶部左侍郎陳山爲戶部尚書兼謹身殿大學士直文淵閣乙丑黎利攻交趾城王通擊敗之夏四月庚申置蘇松常杭嘉湖六府課農官黎利陷昌江指揮李任顧福劉順知府劉子輔死之甲子晉王濟熿有罪免爲庶人王通許黎利和介其使進表及方物五月己亥奉昭皇帝神主祔廟丙午錄囚秋七月己亥黎利陷隘留關以征蠻將軍顧興祖擁兵不救逮治之庚子錄囚辛丑都督同知陳懷爲總兵官率師勦松潘叛蠻丁未薛祿襲寇於開平東南破之八月甲子黃淮致仕免徐州保定河間及山西河南三十八州縣被災者稅糧九月壬辰錄囚乙未柳升深入交趾

覆師於倒馬坡升及梁銘李慶崔聚郎中史安王事陳鏞等皆死之冬十月丙寅重囚俱宥死輸作戊寅王通棄交趾與黎利盟壬午鴻臚寺進黎利與柳升書請立安南陳氏遺嗣曷癸未黎利遣人至京代上陳曷表乞宥罪復國十一月乙酉詔赦利等罪遣侍郎李琦羅汝敬等立陳曷爲安南國王悉召文武吏士還京師凡八萬六千餘人已亥以皇長子生赦天下免明年稅糧三之一十二月丁丑賑陝西饑并給南京絹布十五萬匹因作書愧詩以示廷臣是年占城暹羅琉球朝鮮瓦剌哈密亦力把里撒馬兒罕俱入貢朝鮮使四至三年春正月陳懷奏松潘叛蠻平二月戊午立皇長子祁鎮爲皇太子丁卯奉太后遊西苑登萬歲山奉觴上壽三月癸

未廢皇后胡氏立貴妃孫氏爲皇后壬辰錄囚夏四月癸丑
勅諭黎利閏月壬寅錄囚賑平陽四十一州縣旱饑悉免稅
糧甲辰復遣使撫恤流民戊申論違命棄交趾罪王通馬瑛
陳智李安方政及布政使弋謙中官山壽馬騏皆坐死籍其
家并下顧興祖於錦衣衛獄五月壬子李琦等使交趾還上
黎利表謂陳暠已卒陳氏子孫並絕守國俟命辛酉錄囚己
巳復遣羅汝敬諭黎利立陳氏後辛未贈恤交趾死難諸臣
壬申免真定順德廣平所屬三州二十六縣被災者夏稅六
月丙戌免西安延安鞏昌所屬四州十四縣被災者夏稅丁
未右都御史劉觀巡視河道大臣視河自此始秋七月戊辰
錄囚八月辛卯罷北京行後軍都督府及行部丙午以巡邊

告太廟釋邊衛將士罪丁未發京師九月辛亥次石門驛聞
兀良哈萬衆侵邊已入會州帝謂諸將曰此寇無能爲也若
知朕在此必驚遁今須擊之不可失也喜峰口路隘且險可
單騎行朕以精卒三千爲諸將先出其不意禽之必矣或請
益兵帝曰兵在精與和不在多乃齋十日糧以行使駙馬都
尉西寧侯宋瑛武定侯郭玪豐城侯李賢都督冀傑屯遵化
以俟乙卯出喜峰口昧爽抵寬河與寇遇分鐵騎爲兩翼夾
擊之帝親射其前鋒殪三人兩翼飛矢如雨神機砲並發敵
兵大潰自將數百騎直前薄寇餘衆望黃龍旗知帝在行下
馬羅拜請降皆生縛之戊午饗將士於會州甲子班師癸酉
至自喜峰口冬十月乙酉詔曰古者師保之職論道經邦不

煩以政少師義少傅士奇少保原吉太子少傅榮皆先帝簡
畀以遺朕春秋高尚兼有司之事非所以優之也其輟所務
在朕左右講論至理共寧邦家勲階爵祿並如故十一月癸
酉錦衣指揮鍾法保請採珠東莞帝曰是欲擾民以求利下
之獄十二月庚子廣西總兵官山雲討禽忻城諸縣叛蠻是
年占城暹羅瓜哇琉球朝鮮瓦剌哈密安定曲先土魯番亦
力把里撒馬兒罕俱入貢

四年春正月丙子定納米贖罪例二月丁亥羅汝敬還黎利
貢金人方物奏陳氏子孫無存者三月甲戌復遣李琦諭黎
利更訪陳氏後夏四月戊寅書諭寧王權戊子遣工部尚書
黃福偕平江伯陳瑄經略漕運大臣督漕自此始五月壬子

錄囚六月甲午詔文吏犯贓如律科斷罷贖罪例己亥寇入
開平掠獨石鎮撫張信百戶盧讓死之庚子薛祿率師督餉
開平秋八月丁丑鄭王瞻埈襄王瞻墀荆王瞻垺淮王瞻墀
俱之藩冬十月丙戌作猗蘭操賜廷臣諭以薦賢爲國之道
庚寅張瑛陳山罷甲午闕武近郊乙未獵於峪口戊戌至自
峪口十一月癸卯薛祿及恭順侯吳克忠率師巡宣府十二
月壬辰罷松花江造船是年瓜哇占城琉球朝鮮榜葛刺哈
密土魯番亦力把里撒馬兒罕俱入貢

五年春正月戊辰夏原吉卒二月乙未奉皇太后謁陵三月
戊申道見耕耨者下馬問農事取耒三推顧侍臣曰朕三舉已
不勝勞况吾民終歲勤動乎賜所過農家鈔已酉至自天壽

山辛亥李琦還黎利貢方物乞封堅稱陳氏無後丙辰免平陽十九州縣去歲旱災田租夏四月戊寅命薛祿李賢率師築赤城諸城堡乙酉遣交趾使臣還諭黎利五月癸卯追奪賊吏誥勅著爲令丙辰命有司修預備倉出官錢收糴備荒癸亥擢郎中況鍾等九人爲知府賜勅遣之六月己卯戶部請遣官捕近畿蝗帝曰聞往年捕蝗之使害民不減於蝗卿等宜知此弊因作捕蝗詩示之秋八月己巳朔日當食陰雨不見禮官請表賀不許己卯戶部尚書黃福總理淮北河南山東屯田事九月丙午以吏部郎中趙新兵部郎中趙倫禮部員外郎吳政都察院監察御史于謙刑部員外郎曹弘越府長史周忱爲六部右侍郎巡撫各省兩畿總督糧稅新江

西倫浙江政湖廣謙河南山西弘北直隸府州縣及山東忱南直隸蘇州等府州縣後各省專設巡撫以爲常冬十月乙亥寇犯遼東遼海衛指揮同知皇甫斌力戰死之丙子巡近郊己卯獵於空道丙戌至洗馬林徧閱城堡兵備壬辰至自洗馬林十一月己未以給事中薛廣等二十五人爲知府賜勅如況鍾等十二月己未內外諸司久淹獄囚者罪之是年朝鮮占城琉球瓜哇瓦剌哈密罕東土魯番撒馬兒罕亦力把里俱入貢

六年春二月丁酉羅汝敬督陝西屯田己亥濬金龍口引河達徐州以便漕運三月乙亥命吏部考察外官自布政按察二司始後爲永制夏四月己酉兵部侍郎柴車經理山西屯

田五月丁卯黎利奉表謝罪乞封六月己亥遣禮部侍郎章
敞右通政徐琦詔利權署安南國事秋七月己巳錄囚壬午
許朶顏三衛市易冬十月庚子都督陳懷奏平松潘叛番十
一月丙子始命官軍兌運民糧乙酉以中官袁琦等在外貪
暴不法分遣御史往械之十二月乙未戮琦等十一人榜其
罪示天下丁未金幼孜卒庚戌遣御史二人巡視寧夏甘州
屯田水利是年朝鮮占城琉球瓦剌哈密蘇門答刺亦力把
里俱入貢

七年春正月辛酉朔日有食之二月甲午錄囚三月庚申頒
寬恤之令辛酉諭禮部尚書胡濙曰朕以官田賦重十減其
三乃聞異時蠲租詔下戶部皆不行甚者戒約有司不得以

詔書爲辭是廢格詔令使澤不下究也自今令在必行毋有
所遏乃出減租詩示之夏四月辛丑蠲山西旱災逋賦壬寅
募商中鹽輸粟入邊己酉增建國子監房舍諸生有家室者
給月糧如南京例五月丁丑諭兵部侍郎王驥西北戍守官
軍須處置得宜驥等議延安慶陽諸衛近寧夏者戍寧夏臨
洮鞏昌蘭州諸衛近甘州者戍甘州從之六月癸卯錄囚癸
丑罷中官入番市馬是月作官箴三十五篇以示百官秋七
月庚辰賦爾風圖詩揭之便殿八月乙未勅吏部都察院黜
方面有司不職者九月庚午命諸將巡邊是秋免兩畿及嘉
興湖州被水者稅糧冬十一月辛酉召督漕平江伯陳瑄及
巡撫侍郎趙新等歲終集京師議事是年朝鮮占城琉球哈

密哈烈瓦刺亦力把里俱入貢

八年春二月壬子錄囚三月庚辰諭衛所優恤軍士內外風
憲官察苛虐者罪之是春以兩畿河南山東山西久旱遣賑
饑民夏四月戊戌詔京省被災者悉蠲逋租雜課免今年夏
稅賜復一年雜犯死罪以下減等有司各舉賢良方正一人
貪酷虐民者巡撫御史以聞五月丁巳總兵官都督蕭授討
平貴州烏羅叛苗六月辛丑詔中外疏決罪囚是夏復賑兩
畿河南山東山西州縣饑免被災者稅糧秋七月壬申免江
西八府被水者稅糧八月癸巳減京師冗官閏月辛亥西域
貢麒麟戊午景星見禮官請表賀皆不許九月乙酉遣官審
覆京省重囚己亥阿魯台部答卜犯涼州總兵官劉廣擊斬

之是年暹羅占城琉球朝鮮安南滿刺加天方蘇門答刺古
里柯枝阿丹錫蘭山佐法兒甘巴里加異勒忽魯謨斯哈密
瓦刺撒馬兒罕亦力把里俱入貢

九年春二月己酉賑鳳陽淮安揚州徐州四府旱饑乙卯申
兩畿山東山西河南寬恤之令三月戊寅山雲討平思恩叛
蠻甲申交趾土官阮世寧阮公庭以其國亂各率所部來歸
詔撫輯之甲午山雲討平潯柳叛蠻夏四月己未徐琦使安
南還黎利子麟遣使告父喪且獻方物戊辰錄囚五月壬午
瘞暴骸秋七月甲申遣給事中御史督捕兩畿山東山西河
南諸州縣蝗八月庚戌賑湖廣饑甲子勅兩畿湖廣江西河
南巡撫官及三司巡按御史行視災傷蠲秋糧十之四乙丑

罷工部諸採辦己巳瓦剌脫歡攻殺阿魯台遣使來告九月
癸未巡邊發京師乙酉度居庸關丙戌獵於空道乙未阿魯
台子阿卜只俺納款丁酉至洗馬嶺閱城堡己亥大獵諸將
密請出塞襲寇不許冬十月丙午還宮丙辰都督方政討平
松潘叛蠻甲子罷陝西市馬丁卯以兩畿浙江湖廣江西旱
災下寬恤之令發臨清南京兩倉賑之十一月庚子免四川
被災者稅糧是年暹羅占城琉球蘇門答刺哈密瓦剌俱入
貢朝鮮使四至

十年春正月癸酉朔有疾不視朝羣臣朝皇太子於文華殿
甲戌大漸召還採買營造諸使罷其役乙亥崩於乾清宮年
三十有八遺詔國家重務白皇太后行丁酉上尊諡廟號宣

宗

明史藁

卷第七終

慎堂

明史藁

本紀第八

光祿大夫

經筵講官明史總裁戶部尚書加七級

臣王鴻緒奉

敕編撰

英宗

英宗法天立道仁明誠敬昭文憲武至德廣孝睿皇帝諱祁
 鎮宣宗長子貴妃孫氏所出生四月立為皇太子遂冊貴妃
 為皇后宣德十年方九歲宣宗崩春正月壬午太子即皇帝
 位大事白於皇太后大赦天下丁亥蹇義卒庚寅罷天下鎮
 守中官辛丑戶部尚書黃福參贊機務南京守備二月戊申
 尊皇太后為太皇太后庚戌尊皇后為皇太后辛亥封弟祁
 鈺為郕王甲寅罷諸司冗費三月戊寅放教坊司樂工三千

八百餘人辛巳罷山陵夫役萬七千人夏四月丁卯以久旱
考察布按二司及府州縣官戊辰給事中御史督捕畿南山
東河南蝗著爲令或南畿他省特遣大臣倣此五月庚辰錄
囚壬午戶部言浙江蘇松荒田及舊額官田減除稅糧二百
七十七萬餘石請加覆覈帝曰減除稅糧以蘇民困也又令
覈實必增額爲民患其已之六月癸卯寇犯大同丁未瘞暴
骸辛酉葬章皇帝於景陵秋七月丙子蠲山西夏稅之半八
月丙午減光祿寺膳夫四千七百餘人九月庚寅龍州獻瑞
麥詔所在旱蝗若此類毋獻壬辰召督漕總兵及諸巡撫集
京師議事自是歲以八月至京師冬十二月壬子阿台朶兒
只伯犯鎮番總兵官陳懋敗之於黑山是年朝鮮琉球中山
安南滿刺加哈密瓦剌俱入貢

正統元年春正月丙戌罷銅仁金場庚寅發禁軍二萬屯種
北直隸閒田二月丙辰定經筵儀注命英國公張輔知經筵事
大學士楊士奇楊榮楊溥同知經筵事少詹王直王英侍讀
學士李時勉錢習禮侍講學士陳循侍讀苗衷侍講高穀修
撰馬愉曹鼐兼經筵官翰林春坊儒臣分直侍講寇犯大同
千戶葉林等戰死三月癸酉寇犯山丹指揮陳玘戰死夏四
月丁酉朔親享太廟自後每歲親享五月丁卯朶兒只伯寇
肅州壬辰設提督學校官後以爲常南北直隸用監察御史
各省用按察司副使僉事閏六月丙戌寇犯肅州大掠秋八
月甲戌以都督蔣貴爲總兵官都督同知趙安副之率師討

阿台朶兒只伯九月癸卯刑部侍郎何文淵戶部侍郎王佐
都察院副都御史朱與言提督兩淮長蘆兩浙鹽課朝官巡
鹽自此始庚申遣兵部侍郎李郁通政司通政柰亨封黎利
子麟爲安南國王冬十一月乙卯詔京官三品以上舉堪任
御史者四品及侍從言官舉堪任知縣者各一人免湖廣被
災者稅糧十二月丁丑以邊議稽緩下兵部尚書王驥侍郎
鄺埜於獄尋釋之給事中御史皆予杖乙酉鎮守湖廣貴州
總兵官蕭授討廣西蒙顧十八洞賊平之是年琉球中山瓜
哇朝鮮安南烏思藏占城瓦剌俱入貢宣德時有古里蘇門
答刺錫蘭山柯枝天方加異勒阿丹忽魯謨斯祖法兒甘巴
里直臘十一國貢使未回並遣還各國

二年春正月甲午奉章皇帝神主祔廟己亥詔大同總兵官
方政都指揮楊洪寧夏總兵官史昭與蔣貴趙安分道出塞
會勦阿台朶兒只伯三月甲午錄囚戊午御史金敬撫輯河
南陝西逃民夏四月壬午免開封彰德河南懷慶衛輝五府
水災田糧五月庚寅兵部尚書王驥督理甘肅邊務壬寅刑
部尚書魏源整飭大同邊務丁未免陝西六府旱災夏稅辛
亥瘞暴骸六月庚辰鳳陽淮安揚州河南開封諸府徐滁和
諸州大水副都御史賈諒工部侍郎鄭辰往賑之冬十月甲
子以都督任禮爲平羌將軍總兵官蔣貴趙安爲左右副總
兵兵部侍郎柴車僉都御史曹翼羅亨信參贊軍務討阿台
朶兒只伯兵部尚書王驥太監王貴監督之十一月乙巳賑

河南饑免其稅糧是年琉球中山撒馬兒罕暹羅朝鮮土魯番瓦刺哈密俱入貢

三年春三月辛丑賑陝西饑夏四月乙卯王驥任禮蔣貴趙安襲擊阿台朶兒只伯大破之癸未立大同馬市六月癸酉以旱命中外讞疑獄乙亥命都督方政都督僉事張榮與征南將軍黔國公沐晟右都督沐昂討麓川叛蠻思任發秋七月癸未下禮部尚書胡濙等於獄辛卯下戶部尚書劉中敷等於獄乙未下刑部尚書魏源等於獄尋俱釋之八月乙亥以陝西旱澇迭告令雜犯死囚以下輸銀贖罪送邊吏易米九月癸巳蠲兩畿湖廣逋賦冬十月癸丑賑陝西饑十二月丙辰下三法司刑部尚書魏源右都御史陳智等於獄是年

琉球中山朝鮮暹羅占城瓦刺俱入貢榜葛刺貢麒麟中外表賀

四年春正月壬午沐晟等征麓川都督方政攻破大寨追至空泥敗績而陷尋以晟請命都督吳亮馬翔率師聽晟節制二月丁巳肅授平討砂叛苗閏月丙申免淮揚被災稅糧辛丑釋魏源陳智等復其官三月己酉詔赦天下庚申遼王貴烺有罪廢爲庶人丁卯沐晟卒於軍癸酉增文武官吏旂軍祿廩夏五月庚戌以黔國公沐昂爲征南將軍總兵官率吳亮等討思任發丁卯錄囚壬申京師大雨六月丁酉以京畿大水祭告天地諭羣臣修省戊戌下詔寬恤求直言秋七月庚戌免山東江西河南被災者稅糧壬申汰冗官八月戊戌

增設沿海備倭官冬十二月丁丑都督同知李安充總兵官
僉都御史王翺參贊軍務討松潘祁命簇叛番是年朝鮮琉
球占城安南瓦剌榜葛刺滿刺加哈密俱入貢

五年春正月己未躬祀天地於南郊自後皆躬祀二月乙亥
侍講學士馬愉侍講曹鼐入閣預機務甲申僉都御史張純
大理少卿李吟撫輯畿內流民三月丁巳赦思任發罪夏四
月壬申以山西荒歉免逋賦癸未賑畿內八府饑丙戌祁命
簇番降六月丁丑免兩畿八府災荒田糧戊寅錄囚秋七月
辛丑遣刑部侍郎何文淵等分行天下修備荒之政楊榮卒
八月乙未廣荒政於各邊九月壬寅以麓川用兵蠲雲南逋
賦冬十一月壬寅賑浙江饑壬子免蘇松常鎮嘉湖六府水

災秋糧乙丑沐昂討平師宗叛蠻十二月壬午免南畿浙江
山東河南十二府被災者稅糧是年占城琉球中山哈密烏
思藏俱入貢

六年春正月己亥朔日當食不食禮官請表賀不許乙卯以
莊浪地屢震躬祀郊廟遣使祭西方嶽鎮定西伯蔣貴爲平
蠻將軍都督同知李安僉事劉聚副之討思任發兵部尚書
王驥總督軍務三月庚子下兵部侍郎于謙於獄夏四月己
卯以災異數見遣使祭郊社山川壬辰以南京大風災遣使
祭高廟甲午遣官省天下疑獄五月癸丑刑部侍郎何文淵
大理卿王文錄在京刑獄巡撫侍郎周忱刑科都給事中郭
瑾錄南京刑獄釋于謙爲大理少卿秋七月丁未賑浙江饑

冬十月丁丑下戶部尚書劉中敷等於獄荷校長安門外半月乃釋之庚寅免畿內被災者稅糧十一月甲午朔以乾清坤寧二宮奉天華蓋謹身三殿成大赦天下定都北京文武諸司不稱行在癸卯王驥大破麓川賊於上江癸丑免河南山東被災者稅糧閏月甲戌復下戶部尚書劉中敷等於獄踰年釋中敷爲民十二月王驥等克麓川思任發走孟養左副總兵李安攻餘賊於高黎貢山敗績是年朝鮮占城瓦刺哈密俱入貢

七年春三月壬戌朔謁天壽山陵甲子至自天壽山乙亥免陝西逋賦夏四月甲午賑陝西饑是月免山西河南山東被災者田糧五月壬申以平麓川功進蔣貴爲侯封王驥靖遠

伯戊寅立皇后錢氏丁亥倭陷大嵩所六月壬子戶部侍郎焦宏備倭浙江秋七月丙寅賑陝西饑免其逋賦八月壬寅復命王驥總督雲南軍務九月甲戌陝西進嘉禾禮官請表賀不許冬十月乙巳太皇太后崩癸丑兀良哈掠廣寧前屯十一月己巳掠寨兒山十二月葬誠孝昭皇后是年琉球中山安南朝鮮占城哈密瓜哇瓦刺土魯番烏思藏俱入貢八年春二月己丑汰南京冗官戊戌淮王瞻墀至京丙午荆王瞻埈至京三月癸酉荆王淮王還藩夏五月己巳蔣貴王驥率雲南湖廣四川貴州師五萬征麓川尋以貴爲平蠻將軍諭緬甸執獻思任發父子戊寅雷震奉天殿鴟吻輟朝三日勅羣臣修省大赦天下翰林院侍講劉球應詔陳十事六

月乙未下錦衣衛獄甲辰下大理少卿薛瑄於獄太監王振殺劉球於獄丙午蠲湖廣逋賦秋七月戊午柳祭酒李時勉於國子監門三日是月下刑部尚書王質於獄冬十一月宣宗廢后胡氏卒是年朝鮮占城安南哈密瓜哇俱入貢

九年春正月甲寅右都御史王文巡延安寧夏邊辛未成國公朱勇興安伯徐亨都督馬亮陳懷同太監僧保曹吉祥劉永誠但任分道征兀良哈無功而還二月丙午王驥等擊走思機發俘其孥以獻遂召驥還三月辛亥朔幸太學釋奠於先師甲子楊士奇卒庚午寧夏總兵官黃真勦兀良哈俘其衆以獻夏四月丙戌翰林學士陳循入閣預機務丁亥賑沙州及赤斤蒙古衛饑五月辛未刑部侍郎馬昂錄南京囚六

月壬午賑湖廣貴州苗蠻饑秋七月己酉下駙馬都尉石璟於獄處州礦賊葉宗留殺福建參議竺淵癸丑免河南被災者稅糧閏月戊寅復開福建浙江銀場甲申瘞暴骸乙巳雷震奉先殿鴟吻八月庚戌免陝西被災者稅糧官贖所鬻子女九月丁亥靖遠伯王驥右都御史陳鑑備西北邊冬十月丙午朔日有食之甲子昭皇后祔廟庚午兀良哈貢馬謝罪十二月甲子錄囚癸酉賑赤斤蒙古饑是年兩畿山東河南湖廣浙江大水江河皆溢朝鮮暹羅琉球中山瓦剌安南烏思藏滿剌加俱入貢

十年春正月戊子詔舉智勇之士二月己未免陝西逋賦丙寅兀良哈請貸犯邊者詔戮於市三月甲戌朔謁天壽山陵

丙子至自天壽山自是歲三月謁祭以爲常庚辰思機發入
貢謝罪夏四月乙巳遣御史提督浙江福建銀場庚申詔所
在有司飼逃民復業及流移就食者五月己卯寇犯安化六
月乙丑賑陝西饑免田租大半秋八月癸丑免湖廣旱災秋
糧丙辰免蘇松嘉湖十四府州水災秋糧冬十月戊辰翰林
院學士曹鼎爲左侍郎侍讀學士苗衷爲兵部右侍郎
侍講學士高穀爲工部右侍郎入閣預機務十二月丙辰千
戶王政獲思任發於緬甸斬首函獻京師壬戌輸河南粟賑
陝西饑安遠侯柳溥禽殺廣西叛獍韋萬王是年朝鮮琉球
中山哈密安南滿刺加錫蘭山撒馬兒罕烏思藏俱入貢
十一年春正月庚辰予王振等弟姪錦衣衛世職二月辛酉

異氣見華蓋殿頂及奉天殿獸吻詔恤殊死以下罪囚三月
戊辰下戶部尚書王佐刑部尚書金濂右都御史陳鑑等於
錦衣衛獄尋釋之壬申御史柳華督福建浙江江西兵討礦
賊秋七月庚辰楊溥卒八月戊戌免湖廣被災者秋糧庚申
下吏部尚書王直等於獄尋釋之九月辛巳廣西叛猺執化
州知州茅自得冬十月甲寅遣給事中御史分賚諸邊軍士
是年增市廛商賈稅鈔琉球中山暹羅安南瓜哇回回哈密
占城亦力把力撒馬兒罕烏思藏俱入貢

十二年春三月丙子免杭嘉湖三府被災者秋糧夏四月丁
巳免蘇松常鎮四府被災者秋糧五月己亥大理少卿張驥
賑濟寧至淮揚饑秋七月甲辰飭各邊練軍以備瓦剌九月

乙未馬愉卒是年琉球中山安南占城瓦刺瓜哇哈密暹羅朝鮮俱入貢

十三年春三月戊子詔數孟養罪責獻思機發壬寅都督同知宮聚充總兵官率師討思機發王驥仍總督軍務夏四月辛巳錄囚是月免浙江江西湖廣被災者秋糧五月甲辰刑部侍郎丁鉉撫輯河南山東災民秋七月己酉河決河南沒曹濮東昌工部侍郎王永和治之冬十一月丙戌寧陽侯陳懋為總兵官保定伯梁瑄平江伯陳豫等副之討福建叛賊鄧茂七刑部尚書金濂參贊軍務庚戌永康侯徐安備倭山東十二月庚午廣東賊趙音旺等作亂是年琉球中山朝鮮安南占城哈密瓦刺俱入貢

十四年春正月乙巳免浙江福建銀課二月丁巳捕賊御史丁瑄誘擊鄧茂七於延平斬之己巳王驥破思機發於金沙江又破之鬼哭山思機發遁奉詔班師辛未都指揮僉事徐恭充總兵官討處州叛賊葉宗留工部尚書石璞參贊軍務夏四月壬戌詔王驥等駐武昌征貴州叛苗乙丑遣御史十三人同中官督浙江福建銀課夏五月庚辰捕賊御史柳華自殺丙戌陳懋擊僉事賊其黨殺葉宗留以降壬辰旱太監金英同法司錄囚己亥侍讀學士張益入閣預機務庚子殺福建巡按御史柴文顯汪澄三司以下悉逮治六月丙辰南京奉天華蓋謹身三殿災下詔修省大赦天下甲子詔河南山西番休軍盡赴宣府大同乙丑西寧侯宋瑛督大同軍

戊寅平鄉伯陳懷都督王貴吳克勤分練京軍於大同宣府以備瓦剌秋七月己丑瓦剌分道入寇下詔親征癸巳郕王祁鈺居守英國公張輔成國公朱勇鎮遠侯顧興祖等從行是日瓦剌兵圍馬營城宋瑛及武進伯朱冕與戰於陽和敗歿甲午發京師丁酉至居庸關羣臣請駐蹕不許辛丑至宣府大風雨邊警益急羣臣請駐蹕不許丙午次陽和寇兵偽退以誘六師八月己酉次大同鎮守太監郭敬諫阻始議旋師以廣寧伯劉安爲總兵官鎮大同庚戌東還丁巳至宣府庚申也先兵大至恭順侯吳克忠都督吳克勤戰歿朱勇及永順伯薛綬救之至鷓兒嶺全軍盡覆辛酉次土木掘井二丈餘不得水壬戌移營敵兵乘之王師大潰死者數十萬公

侯伯張輔陳瀛陳懷李珍陳垣沈榮駙馬都尉井源都督梁成王貴尚書王佐鄜塾直內閣學士曹鼎張益等皆死之也先擁帝北去甲子敗聞羣臣聚哭於朝侍講徐瑾請南遷兵部侍郎于謙不可乙丑皇太后命郕王監國丁卯立皇子見深爲皇太子戊辰也先擁帝至大同總兵官劉安出謁辛未擁帝至威寧海子乙亥令旨責劉安輕忽諭沿邊諸將自今瓦剌奉駕至恐爲所誘不得輕出九月癸未郕王卽位遙尊帝爲太上皇帝

明史彙

本紀第九

光祿大夫

經筵講官明史總裁戶部尚書加七級臣王鴻緒奉

敕編撰

景帝

恭仁康定景皇帝諱祁鈺宣宗次子也英宗卽位封郕王正
統十四年秋八月英宗北狩奉皇太后命監國丙寅斂通州
糧入京徵兩畿山東河南備倭運糧諸軍入衛戊辰令羣臣
直言時事舉人才擢于謙兵部尚書庚午籍太監王振家右
都御史陳鎰撫安畿內軍民乙亥修撰商輅彭時入閣預機
務九月戊寅增兵守居庸關及諸隘癸未卽皇帝位大赦天
下以明年爲景泰元年詔方面御史復行保舉免景泰二年

田租十之三甲申夷王振族癸巳都指揮僉事李鐸奉皇太后命達於上皇所甲午遣使祭宣府土木陣亡將士瘞其遺骸辛丑兵科給事中孫祥兵部郎中羅通爲右副都御史守紫荆居庸關甲辰侍講徐瑄等行御史事與御史白圭等募兵於畿內山東山西河南都督同知陳友討湖廣貴州叛苗丙午苗圍平越調四川雲南兵會王驥討之以前廣東參議楊信民爲右僉都御史討廣東叛賊黃蕭養冬十月戊申也先擁上皇至大同庚戌至陽和壬子詔諸王勤王乙卯于謙提督諸營武清伯石亨等分守九門丙辰也先陷紫荆關孫祥死之京師戒嚴丁巳詔宣府總兵官楊洪遼東副總兵焦禮施聚山東山西河南陝西巡撫募兵御史將兵入援戊午

上皇至盧溝橋致書於帝諭羣臣固守也先陣西直門上皇止德勝門外都督高禮毛福壽敗敵於彰義門北己未也先擁上皇登土城要大臣迎駕以通政司參議王復爲右通政甲書舍人王榮爲太常少卿出城相見也先邀于謙等出拒之庚申遣使徵朝鮮等兵調河州諸衛土軍入援于謙石亨等連敗敵衆別部攻居庸關亦爲守將所敗壬戌也先擁上皇由良鄉西去焚長陵獻陵景陵諸寢殿甲子上皇出紫荆關丁卯詔止勤王兵瓦剌可汗脫脫不花使來辛未昌平伯楊洪充總兵官都督孫鏗范廣副之勦畿內餘寇壬申敗之於霸州甲戌修復三陵寢殿十一月癸未修沿邊關隘辛卯毛福壽爲總兵官討辰州叛苗壬辰上皇至瓦剌乙未刑部

侍郎耿九疇撫輯鳳陽諸府流民丁酉僉都御史蕭啓祝暹
陸矩鎮河間保定真定十二月庚戌尊皇太后爲上聖皇太
后辛亥王驥爲總兵官討貴州叛苗都督同知董興爲左副
總兵率江西廣西軍討黃蕭養戶部侍郎孟鑑參贊軍務癸
丑尊生母賢妃吳氏爲皇太后甲寅立妃汪氏爲皇后丙辰
詔赦天下己未武清侯石亨昌平侯楊洪安遠侯柳溥等分
練京營軍癸亥死刺寇大同官軍擊却之是冬寇犯甘肅是
年琉球中山朝鮮占城烏思藏瓦刺撒馬兒罕俱入貢
景泰元年春正月丁丑朔以上皇在北罷朝賀壬午享太廟
丙戌大祀天地於南郊甲午石亨楊洪備大同宣府閏月甲
寅寇掠寧夏庚午都督郭登敗瓦刺兵於沙窩又追敗之栲

栲山封登定襄伯辛未停浙江諸處織造二月戊寅耕藉田
丙戌石亨爲鎮國大將軍充總兵官巡大同都指揮同知楊
能充遊擊將軍巡宣府三月己酉瓦刺自朔州入寇辛亥錄
土木死事諸臣後癸丑死刺寇寧夏抵慶陽乙卯寇朔州夏
四月丙子廣東都指揮李昇何貴等追海賊被殺辛巳死刺
寇大同官軍迎戰禽其將丁亥梁琦代王驥討貴州叛苗丙
申死刺寇鴈門丁酉入石峰口燒關門而去己亥都指揮石
瑞等練兵於真保二府涿易通三州都督同知劉安爲總兵
官領之僉都御史曹泰參贊軍務庚子賑山東饑辛丑賑畿
內被寇州縣癸卯死刺寇大同郭登擊却之五月乙巳免山
西被災者稅糧死刺掠河曲及義井屯堡分兵自代州南下

詔劉安督涿易諸軍禦之副總兵都督僉事田禮討敗貴州
叛苗戊申瓦刺寇鴈門益兵黃花鎮以衛陵寢辛亥寇宣府
癸丑寇威遠乙卯以旱災星變錄囚丙寅侍郎侯璉等破貴
州叛苗辛未瓦刺知院阿刺貢馬請和六月己卯總兵官董
興等破廣東餘賊執黃蕭養父賊平壬午瓦刺寇大同郭登
擊却之丙戌也先復擁上皇至大同丁亥下左都御史陳鎰
王文於獄尋釋之戊子瓦刺寇宣府都督朱謙參將紀廣禦
却之庚寅寇大同戊戌阿刺復遣使貢馬免山東被災者稅
糧己亥禮科都給事中李寔爲禮部侍郎大理寺丞羅綺爲
右少卿使瓦刺秋七月戊申瓦刺可汗使來庚戌尚書侯璉
參將方瑛破貴州苗禽僞苗王王阿同等送京師伏誅庚申

右都御史楊善工部侍郎趙榮使瓦刺癸亥李寔還自瓦刺
己巳楊善抵瓦刺也先許送上皇還八月癸酉上皇發瓦刺
戊寅祀太社太稷遼東被寇總兵官曹義等擊却之壬午上
皇至宣府甲申遣侍讀商輅迎上皇於居庸關丙戌上皇還
京師帝迎見於東安門遂入南宮帝及百官朝謁庚寅赦天
下辛卯刑部侍郎江淵兼翰林學士入閣預機務九月癸丑
河南巡撫王來爲右都御史總督湖廣貴州軍務討叛苗冬
十月辛卯錄囚癸巳免畿內遺賊己亥梁瑄等破貴州苗十
一月壬寅僉都御史王竑同都督僉事徐恭總督漕運辛亥
上皇壽辰尚書胡濙等請朝賀不許十二月丙申胡濙等請
明年正旦百官朝上皇於延安門不許是年朝鮮貢馬三次

閏月癸未復開處州銀場是月福建盜復起冬十月戊戌以閣臣請增置閣員命左都御史王文入文淵閣辦事丙辰都督孫鏗僉事石彪協守大同都督同知衛穎僉事楊能張欽協守宣府以備也先十一月戊辰都督方瑛平白石崖諸苗甲戌命畿內山東山西有司撫恤逃民復賦役五年是月免畿內山東被水者稅糧十二月癸巳始立團營太監阮讓都督楊俊等分統之聽于謙石亨及太監劉永誠曹吉祥節制庚子命布政按察二使缺官三品以上保舉丙辰免河南被災者秋糧是年瓦剌琉球中山朝鮮瓜哇暹羅安南哈密烏思藏俱入貢

四年春正月壬午河決沙灣新口二月戊子五開清浪諸苗叛命梁瑤王來討之庚戌 江西去年被災者秋糧三月戊寅開建寧銀場夏四月戊子築沙灣決口己酉詔天下生員納米徐州東昌臨清以賑死者許入監讀書五月丁巳出徐淮倉粟賑饑運蘇州糧以餉之己巳王文復至申留山東應運米九十二萬石以備賑甲戌徐州大雨沒稼以改撥支運及鹽課糧賑之乙酉河復決沙灣六月壬辰下吏部尚書何文淵於獄尋釋致仕辛亥瘞土木大同紫荆關暴骸七月庚辰停諸不急工役八月己丑賑河南饑甲午也先自立爲可汗丁酉下巡撫都御史洪英於獄尋釋致仕冬十月甲午以徐有貞爲右僉都御史治沙灣河戊戌也先獻馬十一月辛未皇太子薨十二月乙未免山東被災者稅糧乙巳發帑

金三十七萬兩分遣御史賚各邊軍士是年朝鮮琉球中山安南瓜哇日本占城哈密俱入貢

五年春正月戊午黃河清白龍門至於芮城禮官請表賀不許壬申罷福州建寧銀場甲戌平江侯陳豫學士江淵撫輯山東河南被災軍民廷臣議寬恤事宜推行於畿輔二月乙巳以雨暘弗時諭廷臣修省陳弭災之道三月辛酉學士江淵副都御史王竑賑淮北饑民王文撫恤揚州蘇州諸府甲子總督兩廣副都御史馬昂破瀧水獠俘其首以獻庚辰緬甸執思機發檻致京師伏誅夏四月壬午朔日有食之辛卯方瑛破草塘苗俘其酋以獻誅之辛丑以江南北屢災遣高穀祭祖陵皇陵孝陵五月甲子下禮部郎中章綸御史鍾同

於錦衣衛獄六月戊子錄囚秋九月壬戌免蘇松常揚杭嘉湖七府漕糧二百十七萬石別運淮徐臨德四倉糧以補之冬十月庚辰劉廣衡巡撫浙江福建專司討賊十一月戊午罷蘇松常鎮織造採辦十二月免蘇松常鎮揚杭嘉湖八府被災者秋糧是年安南朝鮮琉球中山瓜哇俱入貢也先爲知院阿剌所殺

六年春二月壬午太監王誠同法司刑科錄囚大理少卿李茂等錄南京浙江囚夏四月辛巳以災傷勅戶兵二部兩畿山東河南浙江湖廣撫按三司官條具寬恤事宜罷諸不急務五月巳巳躬禱雨南郊六月癸未河決開封秋七月乙亥沙灣決口隄成庚寅以南京屢災勅諸臣修省八月乙巳考

察御史庚申杖南京大理少卿廖莊於闕下禮部郎中章綸御史鍾同於獄同卒九月乙亥賑蘇松饑民米麥一百萬餘石冬十月戊午免陝西被災者稅糧十一月乙亥南和伯方瑛爲平蠻將軍充總兵官署都督僉事白玉充副總兵討湖廣叛苗十二月己巳免南畿被災者秋糧是年琉球中山朝鮮暹羅哈密滿刺加俱入貢

七年春正月己卯尚書石璞撫安湖廣軍二月庚申皇后崩甲子營壽陵三月戊寅免雲南被災者稅糧夏五月戊寅以星變勅内外文武官修省六月庚申葬肅孝皇后冬十月癸卯賑江西饑十二月己亥方瑛破苗百六十餘寨戊午賑畿內山東河南水災癸亥以疾罷明年元會是冬免畿內山東

江南被災者稅糧又盡蠲天下景泰以前逋賦是年琉球中山朝鮮撒馬兒罕烏思藏俱入貢

八年春正月丁丑輿疾宿南郊齋宮己卯胡濙等請建太子不許壬午武清侯石亨副都御史徐有貞等迎上皇復於位二月乙未廢帝爲郕王遷之西內庚子皇太后吳氏以下皆復故號壬寅掌欽天監禮部侍郎湯序請革景泰年號不許癸丑郕王薨於西宮年三十諡曰戾毀所營壽陵以親王禮葬金山給武成中衛軍二百戶守護成化十一年十二月戊子制曰朕叔郕王踐阼戡難保邦奠安宗社殆將八載彌留之際奸臣貪功妄興讒構請削帝號先帝旋知其枉每用悔恨以次抵諸奸於法不幸上賓不及舉正朕敦念親親用成

先志可仍皇帝之號其議諡以聞遂上尊諡勅有司修繕陵寢祭享如諸陵

明史藁

本紀第十

光祿大夫 經筵講官明史總裁戶部尚書加七級臣王鴻緒奉 敕編撰

英宗後紀

天順元年正月壬午昧爽武清侯石亨都督張軫張軫都御史楊善副都御史徐有貞太監曹吉祥等以兵迎帝於南宮御奉天門百官入賀退御文華殿命有貞以原官兼翰林學士入閣預機務召陳循等草制宣諭羣臣日中御奉天殿卽位執于謙王文中官王誠舒良等俱下錦衣衛獄以太常卿許彬爲禮部右侍郎兼翰林學士入閣預機務甲申大理寺卿薛瑄爲禮部右侍郎兼翰林學士入閣預機務丙戌詔示

臣民改景泰八年爲天順元年大赦天下論迎駕功封石亨忠國公張軹太平侯張輓文安伯楊善興濟伯擢曹吉祥嗣子欽都督同知丁亥殺于謙王文及王誠舒良等籍其家謫陳循江淵等戍邊黜蕭鎡商輅等爲民巳丑再論迎駕功官舍旗軍遷級者凡三千餘人辛卯罷諸巡撫提督官壬辰榜于謙王誠黨人及郟府舊僚示天下二月乙未黜郟府舊僚禮部尙書章文等有差庚子高穀致仕汰部院諸臣癸卯吏部右侍郎李賢兼翰林院學士入閣預機務戊申柳溥破廣西叛蠻癸丑郟王薨戊午方瑛石璞破叛苗壬戌免南畿被災者秋糧三月巳巳皇太子復於位封皇子見潞德王見澍秀王見澤崇王見浚吉王癸酉封徐有貞武功伯乙亥大賚

文武軍民庚辰石亨爲征虜副將軍勦寇延綏丁亥賑山東饑夏四月甲午以災異數見躬禱上帝命廷臣列軍民利病以聞乙未免浙江被災者稅糧丁酉湖廣貴州總兵官方瑛破銅鼓藕洞諸叛苗丙午大學士徐有貞等察罷監司知府三十六人丁未錄囚癸丑罷團營乙卯寇犯寧夏五月辛未詔安遠侯柳溥率師巡宣府大同邊巳丑賑山東饑是月下御史張鵬楊瑄等於獄六月甲午下右都御史耿九疇副都御史羅綺於獄巳亥下徐有貞李賢於獄大雨雹擊毀奉天門東吻勅羣臣修省庚子出有貞賢綺爲參政九疇布政使御史盛顥等十二人爲知縣戊楊瑄張鵬於邊未幾留賢爲吏部侍郎通政參議兼侍讀呂原入閣預機務壬寅薛瑄致

仕癸卯修撰岳正入閣預機務乙巳殺貴州巡撫蔣琳秋七月乙丑復下徐有貞於獄丙寅承天門災丁卯躬禱於南郊引罪自責戊辰勅羣臣修省庚午進李賢吏部尙書兼翰林學士復入閣預機務改許彬南京禮部侍郎辛未岳正謫欽州同知尋下錦衣衛獄戊肅州癸酉大赦天下癸未放徐有貞於金齒辛卯大賚諸邊軍十八月甲午以彗星屢見躬禱於上帝九月甲子太常少卿兼侍讀彭時以原官兼翰林院學士入閣預機務丙寅僉都御史林聰賑山東饑民一百四十五萬餘口冬十月丁酉賜王振祭葬丙辰釋建庶人文圭及其母楊氏等十八人使居鳳陽有司月致廩餼婚娶出入自便十一月甲戌廣西總兵官武進伯朱瑛討田州叛蠻已

丑免山東被災者夏稅十二月壬辰封曹欽昭武伯辛丑安遠侯柳溥爲平虜大將軍充總兵官都督過興都督同知雷通爲左右副總兵禦寇甘涼宣城伯衛穎爲平羌將軍鎮守甘肅是年琉球中山朝鮮安南暹羅占城哈密烏思藏俱入貢

二年春正月辛酉兵部尙書陳汝言有罪下獄籍其家乙丑享太廟甲戌大祀天地於南郊巳卯上皇太后尊號辛巳頒詔優老二月戊申開雲南福建浙江銀場遣內官市雲南珍寶夏四月乙丑皇太子出閣講學辛未復設遼東宣府大同延綏寧夏甘肅巡撫官以右副都僉都御史白圭王宇李秉徐瑄陳翼芮釗爲之五月壬寅以處士吳與弼爲左春坊左

諭德固辭不拜秋七月癸卯定遠伯石彪爲平夷將軍充總兵官都督劉深充副總兵禦寇寧夏八月戊辰孛來犯鎮番冬十月壬午武平伯陳友爲征夷將軍充總兵官勦寇寧夏十一月甲寅免山東被災者秋糧十二月戊午柳溥失律罷是年安南朝鮮烏思藏占城哈密緬甸俱入貢

三年春正月乙未賜王振祠曰旌忠甲辰寇犯安邊營石彪與彰武伯楊信等敗之斬其酋鬼力赤進彪爲侯二月丁卯御史呂洪同中官采珠於雷州廉州夏四月壬子巡撫兩廣僉都御史葉盛破瀧水獠已巳方瑛等克東苗俱擒賊首送京師伏誅庚子詔兩廣守臣總兵官劉深等會勦廣西流賊秋八月庚戌石彪有罪下錦衣衛獄尋逮其黨七十六人已

未勅文武大臣無故不得相往來給事中御史及錦衣官不得與文武大臣交通違者如鐵榜論罪乙亥免湖廣被災者秋糧冬十月庚午石亨以罪罷諸冒奪門功遷者自首更正隱者坐之黜四千餘人是月命法司會廷臣霜降前錄重囚後以爲常十一月癸巳賑湖廣饑免其稅糧是年朝鮮哈密琉球中山錫蘭山滿刺加俱入貢

四年春正月癸卯石亨有罪下錦衣衛獄甲辰籍石彪家二月辛亥勅戒文武羣臣宥亨黨不問壬子撞陷梧州癸亥石亨瘦死丁卯戮石彪三月戊戌免南畿被災者秋糧夏四月巳酉分遣中官督浙江雲南福建四川銀課壬子襄王瞻墿來朝乙亥還藩五月壬午免畿內及浙江被災者秋糧巳亥

罷中官督蘇杭織造六月癸亥免湖廣被災者稅糧秋七月
乙亥朔日有食之辛卯自五月連雨抵是月淮水決堤敗鳳
陽城遣使賑恤八月甲子李來三道入寇命大同總兵官高
陽伯李文宣府總兵武強伯楊能悉力禦之癸酉李來大舉
入寇越雁門關掠代朔忻諸州命都督顏彪馮宗屯紫荆倒
馬二關寇旋引去九月庚辰寇圍大同右衛庚寅撫寧伯朱
永都督白玉鮑政率京軍巡宣府邊甲午免江西被災者秋
糧閏十一月丁巳以月食失占下禮部侍郎掌欽天監事湯
序於獄是年琉球中山朝鮮安南占城瓜哇哈密烏思藏俱
入貢

五年春二月己卯免山東被災者秋糧甲午李來寇莊浪丙
申顏彪爲征夷將軍充總兵官討大藤峽叛猺三月壬子免
蘇松常鎮四府被災者秋糧丙寅湖廣貴州總兵官李震會
廣西軍克十八團猺夏四月癸巳李來寇邊命兵部侍郎白
圭督陝西諸軍禦之五月丙午寇犯宣府丁未免河南被災
者秋糧六月丙子李來犯陝西總兵官仇廉敗績壬午命兵
部尚書馬昂總督軍務懷寧伯孫鏗充總兵官都督馮宗爲
副率京軍往擊之秋七月庚子總督京營太監曹吉祥及其
從子昭武伯欽反殺左都御史寇深錦衣指揮遂杲執大學
士李賢吏部尚書王翱火攻東西長安門懷寧伯孫鏗集衆
擊之欽敗死癸卯磔吉祥於市夷其族丙午曹欽黨湯序等
皆伏誅丁未免南畿被災者稅糧庚戌大赦天下詔求直言

癸丑黜曹吉祥所部冒迎駕功者丁巳河溢開封工部侍郎薛遠撫恤之戊午進孫鏜爲侯命都督馮宗爲平虜副將軍充總兵官代鏜西征都督僉事趙勝李杲爲左右參將兵部侍郎白圭副都御史王竑參贊軍務辛酉李來三上書乞和遣都指揮詹昇竇顯齎書諭降丁卯寇犯萬全右衛八月壬申犯永昌甲戌犯甘州冬十月壬申以西邊用兵開河南山西陝西納馬例辛卯詹昇等至塞外李來聽命遣使受約十一月丁酉朔日有食之是年朝鮮安南琉球中山哈密亦力把力俱入貢

六年春二月癸酉諭李來夏四月壬申免河南被災者秋糧五月己未免陝西被災者秋糧六月戊辰淮王郝銓來朝秋七月丙申還藩九月乙未皇太后崩冬十月丙戌葬孝恭章皇后是月呂原以母憂去是年朝鮮琉球中山哈密烏思藏俱入貢

七年春正月丙辰命湖廣貴州諸將會師討洪江叛苗二月壬戌詹事陳文爲禮部右侍郎兼翰林學士入閣預機務夏四月壬午逮巡按宣大御史李蕃下錦衣衛獄柳長安左門數日死丙戌遣中官督蘇杭織造六月丁卯逮巡按山西御史韓祺柳長安左門數日死秋七月庚戌免陝西被災者秋糧閏月甲戌上宣宗廢后胡氏尊諡修葺陵寢九月甲戌命鎮守廣東總兵官歐信巡撫葉盛廣西總兵官秦寧侯陳涇尅期會勦廣西叛猺冬十月丁酉賑西安諸府饑發米一百

八十三萬餘石丁未命廣西巡撫僉都御史吳禎節制兩廣諸軍討廣東賊十一月癸酉賊陷梧州殺家居布政使宋欽壬午下右都御史李賓副都御史林聰於錦衣衛獄尋釋之十二月辛卯下刑部尚書陸瑜侍郎周瑄程信於錦衣衛獄尋釋之是年琉球中山朝鮮哈密安南烏思藏俱入貢八年春正月乙卯帝不豫己未命皇太子視事文華殿己巳大漸遺命罷宮妃殉葬庚午帝崩年三十有八三月乙未上尊諡廟號英宗

明史藁

本紀第十終

明史藁

本紀第十一

光祿大夫 經筵講官明史總裁戶部尚書加七級臣王鴻緒奉

敕編撰

憲宗

憲宗繼天凝道誠明仁敬崇文肅武宏德聖孝純皇帝諱見深英宗長子也英宗北狩皇太后命立為皇太子景泰三年廢為沂王天順元年復立為皇太子八年春正月英宗崩乙亥太子即皇帝位詔赦天下賜明年田租三之一罷浙江江西福建陝西臨清鎮守內外官諸邊鎮守內官正統間所無者悉罷之緝事官校及下番使者皆名還二月庚子始以內批授官自後傳奉不絕率取中旨二月甲寅尊皇后為慈懿

皇太后生母貴妃周氏爲皇太后戊午放宮人丙寅毀錦衣衛新獄癸酉詔內閣九卿考覈天下方面官戊寅復立團營夏四月癸未朔日當食不見甲午孝恭章皇后祔廟壬子發帑銀七十六萬餘兩犒邊軍五月丙辰大雨雹勅羣臣修省庚申葬睿皇帝於裕陵秋七月壬申立皇后吳氏八月癸卯廢之下太監牛玉於獄冬十月壬辰立皇后王氏十二月甲辰免京官雜犯罪是年兩畿川廣盜賊大起道路爲不通成化元年春正月乙卯享太廟己未大祀天地於南郊甲子都督同知趙輔爲征夷將軍充總兵官僉都御史韓雍贊理軍務討兩廣叛徭二月戊子祭太社太稷甲午耕藉田三月庚戌四川山都掌蠻作亂丁巳幸太學釋奠於先師夏五月

辛酉大雨雹壬戌滅膳避正殿勅羣臣修省秋七月己酉免天下軍衛屯糧十之三戊午湖廣總兵官李震等奏獲賊首苗蟲蝦甲子賑兩畿浙江河南饑甲戌寇入榆林陝西巡撫項忠寧遠伯任壽延綏巡撫盧祥合兵禦之八月丁丑工部侍郎沈義僉都御史吳琛撫恤兩畿災荒辛巳詔所在瘞飢溺死者庚寅河套毛里孩入犯延綏總兵官房能尾追七百里而還冬十二月癸卯撫寧伯朱永爲征虜將軍充總兵官工部尙書白圭提督軍務率師討荆襄賊是月趙輔韓雍大破大藤峽叛徭是年朝鮮琉球哈密瓜哇烏思藏俱入貢二年春正月戊申復罷團營辛酉奉睿皇帝神主祔廟己巳命九卿舉堪布按二司者二月癸未禮部侍郎鄒幹巡察畿

民疾苦發廩賑之己丑寇犯保德三月己酉李賢起復修撰
羅倫疏諫賢奪情謫廣東市舶司提舉乙卯朱永白圭大破
荆襄賊劉通於南漳閏月癸酉發淮徐倉米四十萬石賑鳳
陽諸府饑癸巳朱永白圭擊擒劉通送京師伏誅其黨石龍
遁轉掠四川夏六月甲辰兩廣賊平趙輔班師乙巳免天下
今年屯糧十之三壬子彰武伯楊信爲平虜將軍充總兵官
陝西巡撫項忠提督軍務興河套寇於延綏秋七月丙子寇
犯寧夏辛巳封皇弟見治爲忻王見沛徽王戊戌毛里孩寇
固原八月丁巳寇犯寧夏都指揮焦政戰沒乙丑寇犯平涼
固原丁卯諭祭于謙冬十月丁未朱永白圭擒石龍十二月
甲寅李賢卒丙辰太常少卿兼侍讀學士劉定之入閣預機
務是月斷藤峽餘賊復起是年朝鮮哈密琉球安南烏思藏
瓦剌俱入貢

三年春正月丙申撫寧侯朱永爲平胡將軍充總兵官統京
軍三萬人會楊信勦寇二月丁酉朔日有食之毛里孩三上
書求貢許之辛丑寇犯大同丁巳湖廣總兵官李震破銅鼓
叛苗八百餘寨三月戊辰復以商輅爲兵部左侍郎兼翰林
學士入閣預機務己巳寇犯大同戊寅犯遼東辛巳復開浙
江福建四川雲南銀場以中官領之夏四月壬寅四川境內
自去年六月以來三百七十五處地震勅戒文武將吏遣使
祭其山川乙巳錄囚癸丑復立團營五月壬申以宣大地震
勅鎮巡官警備六月辛酉襄城伯李瑾爲征夷將軍充總兵

官兵部尙書程信提督軍務率四川貴州兵討山都掌蠻是冬大破之秋七月乙酉以雷震南京午門諭羣臣修省諸大臣皆辭位不許停河南一切採辦九月辛未賑湖廣江西饑冬十二月辛丑杖編修章懋黃仲昭檢討莊景闕下謫官於外是年朝鮮哈密占城烏思藏俱入貢諭朝鮮毋獻珍異四年春三月甲子免湖廣被災者秋糧甲申詔中外勢家不得請田土夏四月丁巳錄四五月丙寅陳文卒癸未遣使錄天下囚六月丙午免江西被災者秋糧辛亥總兵官寧遠伯任壽陝西巡撫陳价討開城叛賊滿俊敗績甲寅慈懿皇太后崩秋七月戊午禮部尙書姚夔及文武百官集議陵廟禮制請合葬祔廟帝初不允羣臣跪哭文華門卒如所請癸酉

右副都御史項忠總督軍務都督同知劉玉充總兵官討滿俊是月任壽陳价與寧夏總兵官廣義伯吳琮會討滿俊敗績都指揮蔣泰申澄被殺八月癸巳地震九月庚申葬孝莊睿皇后於裕陵辛酉賑陝西饑辛未孝莊睿皇后祔廟壬申以京師地震彗星屢見勅羣臣修省大臣商輅姚夔等乞罷不允以言事煩瀆下給事御史董旻胡深等於獄既而釋之冬十月己亥吏部考察諸司斥罷中外聽選官三百餘人十一月壬戌項忠擊擒滿俊送京師伏誅丙子寇犯遼東十二月己酉寇犯延綏都指揮許寧擊敗之是年琉球朝鮮烏思藏哈密日本滿刺加俱入貢

五年夏五月辛丑禮部左侍郎萬安兼翰林學士入閣預機

務六月癸丑朔日有食之辛酉錄囚秋八月辛酉劉定之卒
冬十一月乙未寇犯延綏是年琉球哈密烏思藏滿刺加安
南緬甸土魯番俱入貢勅自後貢使各遵年期毋往來煩數
六年春正月壬寅巡撫大同右副都御史王越遣將分道擊
寇敗之丁未楊信禦寇於胡柴溝亦敗之二月辛未刑部侍
郎曾鞏戶部侍郎原傑副都御史滕昭戶部侍郎黃琛大理
寺少卿宋旻巡視浙江河南福建四川及大名諸府考察官
吏訪軍民疾苦賜勅遣之陝西山西山東湖廣荆襄兩廣貴
州南北直隸有巡撫者江西有撫民按察使者及雲南多土
官皆不遣使責所在官司恤民察吏於是京省撫臣奏斥屬
吏甚衆丁丑禱雨於郊壇戊寅賑廣西饑三月甲申免湖廣

山東被災者稅糧壬寅以去冬阿羅出潛入河套誘朵顏三
衛寇邊命撫寧侯朱永為平虜將軍充總兵官都督劉玉劉
聚為左右副總兵太監傅恭頤恒監督軍務巡撫王越參贊
軍務禦之延綏夏四月壬戌天鼓鳴五月丙申賑畿南山東
河南饑丁酉王越等敗寇於延綏東路六月戊申朔日有食
之秋七月甲辰朱永等敗寇於雙山堡戊寅免四川被災者
稅糧丙戌右都御史項忠吏部侍郎葉盛賑畿輔饑民八月
辛亥賑山西饑免今年稅糧癸丑以旱澇下詔寬恤冬十月
己酉免河南被災者夏稅十二月庚戌遣使十四人分賑畿
輔是年琉球朝鮮烏思藏俱入貢
七年春正月辛巳命京官五品以上及給事御史各舉堪州

縣者一人夏四月己巳錄囚五月辛巳瘞京師暴骸秋七月甲午荆襄總督軍務右都御史項忠奏荆襄賊平流民復業者九十三萬有奇賜復三年八月甲辰山東及嘉湖杭紹大水命所司賑之貸以牛種閏九月己未浙江潮溢漂民居鹽場遣工部侍郎李顥往祭海神修築堤岸冬十一月甲寅立皇子祐極爲皇太子大赦天下十二月甲戌彗星見引咎自責勅羣臣修省條時政闕失民生利病以聞壬午避正殿撤樂御奉天門聽政癸未召朱永還右都御史王越總督延綏諸路兵辛卯錄囚是年朝鮮琉球安南俱入貢

八年春正月癸亥皇太子薨是月寇犯延綏固原平涼夏四月癸酉以京師旱蠲運河水涸遣使禱於郊社山川及淮瀆東海之神乙酉錄囚丁亥遣使錄天下囚五月戊申免陝西山西河南夏稅十之二癸丑武靖侯趙輔爲平虜將軍充總兵官與王越赴延綏諸路擊寇都御史馬文升督陝西兵余子俊督延綏兵徐廷章督寧夏兵及各道總兵參將遊擊俱聽輔越節制秋八月寇犯寧夏深入環慶固原九月辛亥巡按陝西御史王哲言寇據河套去冬至今年夏三入鞏昌會寧近益深入南至通渭秦安西至金縣每入俱由安邊花馬池總兵總督調兵守延綏環慶固原而榆林固原安會相距二千餘里有警難應援宜令輔越專理東路別遣將扼其西路癸丑巡撫延綏右副都御史余子俊言邊兵八萬以上馬亦七萬五千餽餉之費用人四百萬銀八百十五萬有奇如

寇能悔過入貢宜聽輔等遣使招徠之時輔亦逗遛不進力言搜套之難既而以疾乞代冬十一月己酉寧晉伯劉聚為平虜將軍充總兵官代輔屯延綏是年朝鮮琉球哈密安南俱入貢

九年春正月癸丑免湖廣被災者秋糧是月土魯番速檀阿力破哈密據之二月壬戌免山西被災者稅糧三月壬寅減雲南銀課之半庚申賑畿內山東饑夏四月辛酉朔日有食之戊辰以山東旱今年稅糧悉免之癸京畿暴骸是月福餘三衛寇遼東總兵官歐信擊敗之六月壬申賑山西饑已卯免陝西被災者夏稅秋九月辛卯鎮守浙江中官李義杖殺寧波衛指揮馬璋詔勿問庚子王越等襲寇於紅鹽池破之

冬十月乙丑錄囚是年朝鮮哈密琉球暹羅俱入貢

十年夏五月戊申禁藏妖書讖緯者是月免山西陝西被災者稅糧秋八月辛卯都督同知趙勝為平虜將軍充總兵官率京軍討亂加思蘭九月癸丑朔日有食之乙卯免蘇松常鎮四府被水者秋糧冬十一月丙子免河南被災者稅糧十二月己丑罷寶慶諸府採金是年琉球朝鮮烏思藏土魯番俱入貢

十一年春正月癸酉給哈密衣糧穀種二月甲申禁酷刑三月辛未彭時卒夏四月乙酉吏部左侍郎劉翊禮部右侍郎劉吉並兼翰林學士入閣預機務壬辰乾清宮門災己亥錄囚秋八月辛巳浚通惠河冬十一月癸丑立皇子祐樞為皇

太子大赦天下十二月戊子復郕王帝號令所司修飾陵寢
丁酉申禁男子自宮者本身論死家戍邊是年土魯番琉球
暹羅朝鮮滿刺加安南俱入貢以去年琉球貢使還次福州
殺人劫財勅自後二年一貢

十二年春二月甲午以南京正月陰霾地震勅羣臣修省三
月壬戌湖廣總兵官李震大破靖州叛苗夏五月庚申錄囚
丁卯左副都御史原傑撫治荆襄流民傑至請改鄖縣爲鄖
陽府析湖廣襄陽陝西漢中西安河南南陽汝州地屬之大
臣撫治鄖陽自此始秋七月乙丑黑青見祭告天地於禁中
以四事自責戊辰遣使錄天下囚冬十一月巡撫四川右副
都御史張瓚討灣溪叛苗破之是年朝鮮土魯番撒馬兒罕
琉球烏思藏俱入貢

十三年春正月丙午免浙江被災者秋糧己巳置西廠使太
監汪直提督官校刺事閏二月辛酉免山東被災者秋糧三
月戊子免河南被災者稅糧夏四月癸丑刑部郎中武清丁
巳太醫院判蔣宗武庚申禮部郎中樂章行人張廷綱浙江
布政使劉福五月甲戌掌太醫院事左通政方賢俱下西廠
獄丙子以大學士商輅等兵部尙書項忠等言罷西廠六月
甲辰削項忠職庚戌以御史戴縉言復開西廠丁巳商輅致
仕秋七月丁卯以輅黨刑部尙書董方左都御史李賓致仕
是月免江西福建被災者秋糧冬十月戊申城苦峪谷以居
哈密罕慎復立哈密衛給罕慎等土田牛種十二月丁巳免

南畿蘇松常鎮四府水災夏稅是年安南琉球朝鮮烏思藏暹羅日本俱入貢迤北滿都魯札加思蘭各遣使貢馬

十四年春二月戊申皇太子出閣就學三月丙戌復開遼東

馬市丁亥以浙江饑罷採花木戊辰免河南山東浙江被災

者稅糧夏四月壬辰張瓚擊松潘蠻溪叛苗破之丁酉免南

畿山東被災者稅糧六月癸卯太監汪直行遼東邊秋七月

丁丑賑畿南及濟南諸府水災八月癸巳以災故詔六部條

寬恤事宜南京刑部侍郎金紳巡視江西水災戊申朝班若

聞甲兵聲者百官辟易不成列久之始定庚戌免湖廣被災

者秋糧甲寅下巡撫蘇松副都御史牟俸於獄九月己未命

御史三人捕盜畿南冬十二月甲午免北畿被災者秋糧是

年朝鮮占城烏思藏撒馬兒罕俱入貢

十五年春正月庚辰免山東被災者秋糧辛巳賑山東饑二

月庚寅以湖廣去歲旱免秋糧壬子免廣東廣肇高雷廉五

府逋賦甲寅修開國勲臣冢墓無後者置守冢一人三月癸

未免江西被災者秋糧夏四月丙午免南畿被災者秋糧壬

子下駙馬都尉馬誠於獄五月壬戌下兵部侍郎馬文升於

獄戊辰牟俸謫戊庚午馬文升謫戊癸酉以俸文升事中旨

責科道官杖李俊王濬等五十六人於闕下己卯免湖廣河

南被災者稅糧秋七月癸酉汪直行邊八月乙未戶部郎中

裴慧等七人巡視兩畿山東河南水災冬十一月庚子賑河

南饑十二月丙子太白晝見是月免四川湖廣被災者秋糧

是年琉球安南朝鮮烏思藏俱入貢

十六年春正月丁酉太監汪直監督軍務兵部尙書王越提督軍務保國公朱永爲平虜將軍充總兵官率京軍萬人禦寇延綏辛丑免南畿被災者稅糧二月癸酉免湖廣被災者稅糧庚辰王越襲寇於威寧海子破之三月戊子減光祿寺供御物夏六月癸丑禁勢家侵占民田者秋七月甲午倭寇福建冬十二月丙寅寇入大同汪直王越朱永率師禦之已巳大同鎮將范瑾拒寇出境是月總督兩廣右都御史朱英總兵官平鄉伯陳政討廣西叛徭破之是年琉球朝鮮暹羅蘇門答刺土魯番撒馬兒罕俱入貢

十七年春二月壬戌通覈天下庫藏出納之數是月免浙江山西被災者稅糧夏四月庚申久旱風霾勅羣臣修省戊辰太監懷恩同法司錄囚五月己亥寇犯宣府汪直監督軍務王越充總兵官率師禦之秋七月甲戌免南畿被災者稅糧八月癸亥太白晝見是年朝鮮安南占城滿刺加烏思藏俱入貢諭安南還占城侵地

十八年春三月壬申復罷西廠夏四月癸丑罕慎復哈密城入居之癸亥免山西被災者夏稅五月甲申免山東被災者稅糧秋七月庚午副都御史程宗勘雲南木邦夷情庚辰免南畿被災者稅糧是年琉球哈密朝鮮暹羅土魯番烏思藏俱入貢

十九年夏四月癸亥朔太白晝見丁丑免河南被災者稅糧

六月丁丑陳政破廣西叛猺秋七月癸卯寇犯大同總兵官許寧禦之失利己未朱永爲鎮朔將軍充總兵官率京軍禦之八月乙丑戶部侍郎李衍刑部侍郎何喬新巡視邊關壬申汪直有罪降爲奉御其黨王越戴縉等皆坐黜九月丁巳應天鎮江太平寧國廣德量加田租是年朝鮮入貢撒馬兒罕貢獅子

二十年春正月壬辰京師地震勅羣臣修省命減貢獻罷營造理冤獄寬銀課三月己酉定西侯蔣琬充總兵官率京軍與總督大同宣府右副都御史余子俊同禦寇夏四月戊午錄囚五月甲午復錄囚六月庚午設雲南孟密安撫司己卯免陝西被災者秋糧秋七月庚寅陝西旱停歲辦物料八月

癸亥免山西被災者秋糧九月乙酉朔日有食之戊子陝西山西旱大饑人相食是月寇入河套冬十月丁巳下刑部員外郎林俊於獄都督府經歷張黻疏救並予杖謫官癸酉罷元江諸府銀坑十二月辛未免山西被災者夏稅乙亥免河南被災者稅糧是年發帑轉粟醫僧道度牒開納米事例以賑陝西山西饑朝鮮安南日本琉球哈密土魯番俱入貢二十一年春正月丙戌以正旦星變諭羣臣極言時政闕失庚寅詔赦天下發京倉米一百萬石易銀并帑金二十五萬兩分遣大臣賑陝西河南山西饑二月己未放免傳奉文武官五百六十餘人丁丑免陝西被災者夏稅三月庚寅開納米例賑河南饑夏四月壬戌轉漕米四十萬石賑陝西饑戊

辰錄囚甲戌免南畿山東被災者稅糧六月癸未詔盛暑祈
寒朝官所奏毋得過五事秋八月己卯朔日有食之九月甲
子劉珣罷丙寅錄囚冬十月免河南山西陝西山東四川被
災者稅糧十一月丙辰太白晝見丙寅地震十二月甲申詹
事彭華爲吏部左侍郎兼翰林學士入閣預機務壬寅免山
西被災者秋糧是冬寇犯蘭州涼州莊浪鎮番是年朝鮮哈
密烏思藏俱入貢

二十二年春正月乙丑免河南被災者秋糧是月寇犯臨洮
二月庚辰免畿南六府及湖廣被災者稅糧夏四月戊寅錄
囚乙未釐畿內莊田六月乙亥勅羣臣修省乙酉免南畿陝
西被災者稅糧秋七月致仕大學士商輅卒寇犯甘州指揮

姚英等被殺九月乙巳免河南被災者夏稅丁卯兵部左侍
郎尹直爲戶部左侍郎兼翰林學士入閣預機務冬十月乙
亥錄囚是年朝鮮哈密俱入貢

二十三年春正月己巳免陝西湖廣被災者稅糧二月乙酉
副都御史邊鏞通政司參議田景賢巡視大同諸邊三月丁
未彭華致仕癸亥免山東被災者稅糧夏四月庚辰錄囚五
月丙辰以亢旱勅羣臣修省六月己巳朶顏三衛被寇驅逃
入遼東命於近邊駐牧己丑免南畿被災者秋糧秋七月戊
申封皇子祐杭爲興王祐楨岐王祐檉益王祐樞衡王祐檉
雍王八月庚辰不豫乙酉命皇太子視朝於文華殿己丑崩
年四十一九月乙卯上尊謚廟號憲宗

明史藁

本紀第十二

光祿大夫 經筵講官明史總裁戶部尚書加七級臣王鴻緒奉

敕編撰

孝宗

孝宗建天明道誠純中正聖文神武至仁大德敬皇帝諱祐
檉憲宗第三子也母曰淑妃紀氏成化六年七月己卯生於
西宮萬貴妃方專寵宮中莫敢言及悼恭太子薨後憲宗始
知之養周太后宮中十一年勅禮部命名大學士商輅等乃
以建儲請是年紀妃暴薨哀慕如成人然以貴妃故深自斂
晦十一月立為皇太子二十三年秋八月憲宗崩九月壬寅
太子即皇帝位詔赦天下丁未以給事御史公疏斥諸佞幸

者掌通政司禮部左侍郎李孜省等戍邊太監梁芳外戚萬喜等貶謫有差冬十月丁卯汰傳奉官罷右通政任傑等五百六十四人罷左善世等一百二十人法王佛子國師等七百八十九人罷工部侍郎蒯綱等一千三百五十八人罪大者謫戍餘並斥革真人玉冠帶圭銀印法王誥勅印信儀仗悉皆追奪乙亥尊皇太后爲太皇太后皇后爲皇太后丙子立妃張氏爲皇后丁亥萬安罷壬辰上生母孝穆皇太后尊諡癸巳吏部左侍郎兼翰林學士徐溥入文淵閣預機務十一月癸丑尹直罷乙卯少詹劉健爲禮部右侍郎兼翰林學士入文淵閣預機務戊午下梁芳李孜省等於錦衣衛獄十二月壬辰葬純皇帝於茂陵是月免江西湖廣被災者稅糧

弘治元年春正月己亥享太廟丙午大祀天地於南郊己未始考察在外武臣二月戊戌祭太社太稷丁未耕藉田封哈密衛左都督罕慎爲忠順王丙辰禁文武大臣請託公事三月乙丑命吏兵二部疏兩京文武大臣在外知府守備以上姓名揭文華殿壁有遷罷者以新除者易之癸酉幸太學釋奠於先師乙亥寇犯蘭州都指揮廖斌擊敗之丙子開經筵丁丑命儒臣日講壬午始視午朝於左順門己而罷之夏四月甲寅錄囚六月癸巳朔日有食之乙未寇犯大同宣府秋八月乙巳犯山丹永昌辛亥犯石馬營丙辰減雲南銀課九月己卯錄囚冬十月乙卯賑湖廣四川饑十一月甲申妖僧繼曉伏誅乙酉免河南被災者秋糧是年朝鮮琉球占城撒

馬兒罕烏思藏俱入貢

二年春二月癸巳截湖廣漕米二十萬石賑四川饑三月乙丑寇犯宣府獨石夏四月庚戌錄囚丁巳減浙江銀課五月庚申河決開封入沁河役五萬人治之秋七月壬戌勅兩畿錄囚癸亥以京師霖雨南京風雷勅羣臣修省戊寅給畿內貧民麥種八月壬寅勅孟密歸木邦侵地己酉奉純皇帝神主祔廟冬十月乙巳罷浦城銀冶己酉錄囚十二月甲申朔日有食之是年朝鮮土魯番俱入貢撒馬兒罕貢獅子鸚鵡不受

三年春二月壬辰免河南被災者秋糧三月丙辰命天下預備倉積糧以里數多寡爲差不及額者罪之甲戌兵部侍郎

張海左通政元守直隸邊夏四月丙戌寇犯宣府獨石五月甲子錄囚秋閏九月癸巳禁勢家請田土及受人投獻者冬十月辛亥錄囚十二月辛亥以星變勅羣臣修省陳時政得失壬戌減供御品物罷明年上元燈火是年朝鮮琉球安南哈密撒馬兒罕天方土魯番俱入貢

四年春正月癸未罷上元節假辛卯止郊祀慶成宴二月己巳勅法司慎刑夏四月乙丑司禮太監韋泰同法司錄囚秋八月庚戌停蘇松浙江今年織造己未封皇弟祐楳爲壽王祐楳汝王祐楹涇王祐樞榮王祐楷申王冬十月癸丑錄囚戊午河溢賑開封懷慶歸德被災者乙丑禮部尙書掌詹事府事丘濬兼文淵閣大學士入閣預機務十一月庚辰賑南

畿饑十二月甲子土魯番以哈密地及金印來歸是年朝鮮
暹羅俱入貢

五年春二月丙寅命故忠順王脫脫從孫陝巴襲封忠順王
庚午以陝西歲歉減絨旣之半三月戊寅立皇子厚照爲皇
太子大赦天下辛卯總督兩廣都御史閔珪總兵官毛銳討
古田叛獍不利夏四月丁巳錄囚秋七月甲午賑蘇松及山
東饑八月癸卯劉吉致仕乙卯賑浙江水災乙丑以災故停
南京蘇松浙江額外織造召督造官還冬十月庚戌罷寧夏
捕豹丙辰錄囚壬戌貴州黑苗叛鍾守湖廣鍾遠侯顧溥會
貴州巡撫都御史鄧廷瓚討之十一月丙申塞溫處二府銀
坑十二月丁巳荆王見瀟有罪廢爲庶人壬戌申自宮之禁

是年琉球朝鮮烏思藏土魯番俱入貢虎刺撒國獻方物却
之

六年春二月甲寅錄常遇春李文忠鄧愈湯和裔孫世指揮
使丁巳以浙江布政使劉大夏爲右副都御史治張秋決河
戊午留蘇松常湖四府米三十萬石及河南夏稅銀以備賑
夏四月己亥土魯番速檀阿黑麻襲執陝巴據哈密己酉兵
部侍郎張海都督同知紘謙經略哈密癸丑太醫院判劉文
泰劾吏部尙書王恕奸欺尋以恕奏下文泰錦衣衛獄詞連
大學士丘濬降文泰御醫未幾恕致仕去庚申錄囚命南京
法司暑月錄囚如京師辛酉久旱勅羣臣修省條時政五月
丙寅寇犯寧夏殺指揮趙璽閏月乙未免南畿被災者秋糧

六月庚午捕蝗壬申閔珪破古田叛獐秋九月己未錄囚冬
十月丙寅以四方災傷罷明年上元燈火庚辰停甘肅織造
絨毼十一月庚申賑京師流民十二月辛未開銀米事例以
賑荒已卯勅天下鎮巡官修省是年朝鮮安南烏思藏土魯
番俱入貢

七年春二月甲子以去冬雷雹風雨拔孝陵樹遣使祭告天
地孝陵勅兩京羣臣修省求直言三月癸巳鄧廷瓚平貴州
黑苗戊申兩畿捕蝗夏四月丁亥錄囚五月甲辰太監李興
平江伯陳銳同劉大夏治張秋決河秋七月丙午工部左侍
郎徐貫同巡撫右副都御史何鑑經理蘇松嘉湖水利九月
丁亥以水災停蘇松諸府所辦物料留關鈔戶鹽以備賑冬

十月己未錄囚十一月甲戌張秋河工成已卯以韃靼小王
子居賀蘭山後頻犯甘涼永昌莊浪勅諸鎮巡官賑被掠者
家給以牛種是年朝鮮琉球俱入貢以土魯番殘破哈密却
其通貢

八年春正月壬子甘肅總兵官劉寧敗寇於涼州二月乙卯
朔日有食之戊午丘濬卒乙丑禮部右侍郎兼侍讀學士李
東陽少詹事兼侍講學士謝遷入閣預機務己卯黃陵岡河
口工成夏四月壬午錄囚冬十月戊辰錄囚十二月辛酉巡
撫甘肅右僉都御史許進偕劉寧襲哈密復之是年朝鮮瓜
哇占城烏思藏俱入貢西北野乜克力諸部長款肅州塞求
貢却之

九年春二月辛未右通政張璞大理少卿馬中錫閱邊夏四月戊子下給事中龐泮等四十二人御史劉紳等二十人於錦衣衛獄尋釋之丙午錄囚六月庚子免江西被災者稅糧秋九月乙丑錄囚是年琉球朝鮮烏思藏俱入貢

十年春三月辛亥以旱蠲修省求直言夏五月戊辰小王子寇潮河川己巳寇大同六月己卯戶部左侍郎劉大夏兵部左侍郎李介理宣府大同軍餉秋七月癸丑都督楊玉率京營軍備寇永平冬十月壬申錄囚十一月庚子土魯番乞歸陝巴通貢是年安南朝鮮暹羅烏思藏俱入貢

十一年春二月己巳小王子遣使求貢夏四月辛卯錄囚秋七月己酉總制三邊左都御史王越襲寇於賀蘭山後破之癸亥徐溥致仕八月癸未賑祥符民被河患者冬十月丁卯錄囚丁亥以清寧宮災勅羣臣修省極言時政闕失罷明年上元烟火十一月壬子罷陝西織造羊絨閏月壬戌朔日有食之己巳命壽節祈報外齋醮悉罷之十二月庚子榜禁中外奢靡踰制者壬子以清寧宮災詔赦天下是年朝鮮土魯番烏思藏俱入貢

十二年夏四月癸巳申徹宣大延綏邊備丙辰錄囚秋七月己卯以闕里先聖廟災遣使慰祭九月甲申重建清寧宮成冬十月己亥錄囚是年占城朝鮮烏思藏土魯番瓜哇撒馬兒罕俱入貢

十三年春正月己卯禁民間收鬻軍器二月庚寅定問刑條

例夏四月乙巳以寇犯威遠遊擊王杲等敗績平江伯陳銳
爲靖虜將軍充總兵官都督劉寧爲副總兵太監金輔監督
軍務戶部左侍郎許進兼左僉都御史提督軍務率師禦之
庚戌錄囚五月丙辰召大學士劉健李東陽謝遷而議朝政
癸亥寇犯大同左衛六月甲申免江西被災者秋糧停山陝
採辦物料乙未寇犯大同庚子以禦寇無功名陳銳金輔還
命保國公朱暉爲征虜將軍充總兵官太監扶安監督軍務
益兵禦之冬十月癸卯錄囚十二月癸未寇犯大同是年寇
大入延綏神木堡琉球朝鮮土魯番烏思藏俱入貢

十四年春二月己亥罷陝西織造中官夏四月庚辰工部左
侍郎李鏊督延綏諸邊軍餉戊子朱暉及提督軍務右都御
史史琳監督太監苗達分道進師延綏戊戌停山陝一切物
料甲辰錄囚五月庚戌賑大同被兵軍民除其稅糧戊辰遣
使修闕里先聖廟六月甲申遣貴州雲南守臣討普安賊婦
米魯戊戌寇犯延綏清水堡秋七月丁未秦寧衛賊入遼東
長勝諸屯堡戊午寇犯宣府己未入薊州馬蘭峪癸亥南京
戶部尙書王軾兼左副都御史提督貴州軍務討米魯丁卯
朱暉等襲寇於河套庚午分遣科道官清理屯田閏月戊戌
賑兩畿江西山東河南水災八月丁未寇犯固原辛亥大掠
韋州環縣萌城靈州己巳減光祿寺供應如元年之舊寇入
寧夏東路九月丙子朔日有食之丁亥大理丞劉憲太僕少
卿王質往延綏甘肅陝西寧夏召募土兵冬十月戊午錄囚

十一月癸巳刑部侍郎何鑑賑南畿山東災大理丞吳一貫賑畿內河南災十二月戊辰遼東大饑發帑開例以賑之是年朝鮮入貢

十五年春三月癸未召還督造磁器中官夏四月乙丑錄囚秋七月巳丑普安賊平八月庚戌以南京鳳陽風雨為災江水溢遣使祭告郊社山川孝陵太廟辛亥祭告皇陵勅兩京羣臣修省九月庚午朔日有食之丁亥錄囚戊子放減所蓄鳥獸冬十月癸卯罷明年上元烟火十一月壬申瓊州黎符南蛇作亂甲午罷廣東採珠十二月辛亥以疾不視朝是年琉球朝鮮安南俱入貢

十六年春正月癸酉享太廟以疾遣官行禮二月辛丑視朝

戊申躬祀天地於南郊三月癸巳免山西被災者稅糧夏四月乙丑錄囚五月戊子以雲南災變勅兩京羣臣修省遣南京刑部侍郎樊瑩巡視其地察吏安民乙未御文華殿召兵部尚書劉大夏面議政事自後大學士劉健李東陽謝遷尚書馬文升劉大夏都御史戴珊數召見秋九月丁丑清理淮鹽僉都御史王璟視浙江旱災兩畿山東河南湖廣撫按官賑恤壬午崇明海溢冬十月丙午錄囚十一月甲戌罷諸器皿營作及上元烟火十二月丙午免淮揚浙江所辦物料是年朝鮮暹羅安南俱入貢

十七年春正月辛未南京工部侍郎高銓賑應天饑二月丙午留漕糧賑鳳陽諸府饑巳未申讖緯妖書之禁三月壬戌

太皇太后崩夏四月己酉葬孝肅睿皇后丁巳賑淮安火災
閏月辛酉闕里先聖廟成大學士李東陽祭告乙亥以四方
災荒多盜勅羣臣修省己丑錄囚五月壬辰罷南京蘇杭織
造中官六月乙亥始命兩京五品以下官六年一考察癸未
火篩犯大同秋七月癸巳工部侍郎李鑑大理寺少卿吳一
貫通政司參議叢蘭分道經畧邊塞朱暉史琳苗達率師備
邊甲午左副都御史閻仲宇通政司參議熊偉分理大同宣
府居庸等關糧餉八月戊辰命天下撫按三司官奏軍民利
病士庶建言可採者所司酌量以聞九月辛卯錄囚甲寅以
宣大被寇命太常少卿孫交經畧邊事丁巳御煖閣諭劉健
等曰諸邊首功巡按御史察勘動淹歲年非所以示勸自今

奏報以遠近立限違者詰治講官進講直言毋諱冬十一月
辛巳寇入莊浪十二月庚午申閉糴之禁己卯寇犯靈州是
年朝鮮琉球撒馬兒罕哈密烏思藏俱入貢

十八年春正月己丑寇掠韋州環縣戶部侍郎顧佐理陝西
軍餉甲辰陷寧夏清水營夏四月丁丑刑部侍郎何鑑處置
荆襄流民甲申錄囚是日不豫五月庚寅大漸召大學士劉
健李東陽謝遷受顧命謂健等曰東宮聰明但年尙幼先生
輩其教之讀書善輔導之辛卯崩年三十有六六月庚申上
尊諡廟號孝宗

明史藁

本紀第十三

光祿大夫

經筵講官明史總裁戶部尙書加七級臣王鴻緒奉

敕編撰

武宗

武宗承天達道英肅睿哲昭德顯功弘文思孝毅皇帝諱厚
照孝宗嫡長子也弘治五年立為皇太子每遊幸必從性好
騎射弗能禁也十八年夏五月孝宗崩壬寅太子即皇帝位
大赦天下戊申寇犯宣府總兵官張俊禦之鹿角山敗績庚
戌保國公朱暉為征虜將軍充總兵官史琳提督軍務苗達
監督軍務率師禦之秋八月甲寅尊皇太后為太皇太后皇
后為皇太后九月丁酉賑陝西饑冬十月丙辰寇犯甘肅庚

午葬敬皇帝於泰陵

正德元年春正月乙酉享太廟己丑大祀天地於南郊二月
乙丑耕藉田癸酉罷採寶石西珠三月甲申幸太學釋奠於
先師戊戌申自宮之禁夏五月己丑錄囚秋八月戊午立皇
后夏氏是時東宮內侍馬永成谷大用劉瑾等導上鷹犬游
獵微行入市時稱八黨劉健等請誅之給事中劉蕡等合疏
論列並留中冬十月丁巳戶部尚書韓文復率九卿力攻永
成等劉健李東陽謝遷因請亟治其罪傳諭如所請至晚事
變明日戊午劉瑾掌司禮監丘聚谷大用提督東西二廠張
永督十一團營兼神機營魏彬督三千營分據要地健東陽
遷乞去健遷以是日致仕己未東陽復乞去不允壬戌吏部

尚書焦芳兼文淵閣大學士吏部左侍郎王鏊兼翰林院學
士入閣預機務戊辰諭停日講東陽諫不納癸酉給事中呂
紳請留劉健謝遷不納十一月甲辰韓文罷十二月丁巳命
錦衣官點閱給事中是年朝鮮哈密烏思藏俱入貢

二年春正月乙亥朔日有食之三月辛未以大學士劉健謝
遷尚書韓文楊守隨張敷華林瀚等五十三人黨比勅諭羣
臣跪金水橋南宣戒之夏五月戊午度僧道四萬人己巳復
寧王宸濠護衛軍六月甲戌奉敬皇帝神主禱廟戊寅罷各
邊修築輸其費於京師秋八月丙戌作豹房居之冬十月甲
申逮各邊巡撫都御史及管糧郎中下獄後數遣使覈天下
錢穀總制巡撫以下官多以虧耗得罪詔獄爲滿丙戌南京

戶部尚書楊廷和為戶部尚書兼文淵閣大學士入閣預機
務十二月壬辰復開浙江福建四川銀礦是年朝鮮琉球俱
入貢

三年春正月辛亥大計外吏以內批黜翰林學士吳儼御史
楊南金二月己巳令京官病滿一年者致仕夏四月乙亥軍
民輸銀者授都指揮僉事以下官六月壬辰朝罷得匿名文
書御道上跪羣臣承天門外詰責之付詔獄者三百餘人經
宿乃釋時曝死者三人暈而病者無算秋七月壬子選精通
音樂者送京師充三院樂工八月辛巳立內廠劉瑾領之戊
子山東盜起庚寅逮韓文下錦衣衛獄罰輸米千石於大同
九月庚戌諭戶部輸米贖罪者刻期完納違者罪之辛酉逮

劉大夏下錦衣衛獄戊肅州癸亥賑南畿饑冬十月辛未工
部侍郎畢亨賑湖廣河南饑十一月乙未南京侍郎王瓊賑
鳳陽諸府饑是年安南朝鮮哈密撒馬兒罕烏思藏俱入貢
四年春二月丙戌劉健謝遷為民三月甲辰賑浙江災巳酉
詔吏部非時考察京官夏四月乙亥王鏊致仕六月戊子吏
部尚書劉宇兼文淵閣大學士入閣預機務宇乞省墓歸秋
八月辛酉遣使四出覈各邊屯田戶部侍郎韓福至遼東激
義州軍變久之乃定閏九月寇犯延綏冬十一月甲子犯寧
夏十二月庚戌追奪劉健謝遷等六百七十五人誥勅是年
兩廣江西湖廣陝西四川盜皆起朝鮮琉球安南哈密土魯
番撒馬兒罕俱入貢

五年春正月庚辰籍故尙書秦紘家二月癸巳兵部尙書曹元爲吏部尙書兼文淵閣大學士入閣預機務三月辛未免正德三年逋賦乙酉右僉都御史王哲巡視江西南贛刑部尙書兼左都御史洪鍾總制川陝河南鄖陽軍務竝理湖廣賑恤事夏四月庚寅安化王寘鐸反殺巡撫都御史安惟學總兵官姜漢等甲午寇入莊浪巡撫張翼等擊却之己酉削寘鐸簡起右都御史楊一清總制陝西寧夏延綏甘涼軍務都督神英爲平胡將軍充總兵官率師討之辛亥詔赦天下太監張永總督軍務是日寧夏遊擊都指揮僉事仇鉞襲執寘鐸以獻五月癸未焦芳致仕六月庚子帝自稱大慶法王西天覺道圓明自在大定慧佛命所司刻印以進秋七月壬申寇犯臨水堡八月甲午執太監劉瑾繫於菜廠丁酉下獄詔自正德二年後所更政令諸司悉釐定以聞戊戌治瑾黨罪下吏部尙書張綵等於獄己亥曹元致仕丁未復革寧府護衛軍戊申劉瑾伏誅己酉雪謫戍諸臣之誣枉者九月丙辰以平寘鐸功封仇鉞咸寧伯戊午掌詹事府吏部尙書劉忠南京吏部尙書梁儲竝爲吏部尙書兼文淵閣大學士入閣預機務己未以平寘鐸功封義子指揮同知朱德太監谷皆爲伯癸酉又以平寘鐸功封義子指揮同知朱德太監谷大用兄大寬馬永成兄山魏彬弟英皆爲伯冬十月己亥張綵伏誅乙巳貸霸州賊劉七等三十四人罪未幾復叛是年

朝鮮日本占城哈密撒馬兒罕土魯番烏思藏俱入貢

六年春二月巳酉以江西賊熾起前左都御史陳金總制江西軍務討之三月庚午寇入河套犯沿邊諸堡惠安伯張偉充總兵官右都御史馬中錫提督軍務帥京營銳卒討畿輔山東賊丙子免所在被寇者稅糧一年夏四月癸未劉忠致仕六月甲午山西盜起秋七月癸酉畿內山東河南賊勢益盛京軍不能獨制發宣府延綏二鎮兵八月巳卯兵部侍郎陸完提督軍務竝將其軍以討賊總制兵部尙書洪鍾巡撫四川右副都御史林俊擒四川賊首藍廷瑞鄆本恕等誅之甲申賊劉六等犯固安京師戒嚴召見閣臣於左順門議防禦策發帑銀賑被寇州縣九月巳酉廣西叛徭平冬十月甲申劉六等焚糧艘千二百有奇丁酉寇犯甘肅山丹爲邊將

所敗十一月庚戌太監谷大用總督軍務張忠監管神鎗伏羌伯毛銳充總兵官率京軍會陸完勦賊丙辰戶部侍郎叢蘭王瓊賑被寇州縣辛酉以京師地震勅羣臣修省乙亥命用兵所在瘞暴骸十二月癸巳禮部尙書費宏兼文淵閣大學士入閣預機務庚子益發邊軍討賊清河口至柳舖九十里黃河清自甲午至丙申是年朝鮮琉球哈密俱入貢七年春正月甲寅劉六犯霸州京師戒嚴二月丁丑巡撫保定右副都御史彭澤同咸寧伯仇鉞提督軍務太監陸閻監督軍務討河南賊夏四月戊子發廩賑畿內山東饑五月甲寅陳金討撫州賊平之丙寅賊殺總督南京糧儲右副都御史馬炳然於江劉六尋溺死閏月巳丑寇犯甘肅壬辰仇鉞

討河南賊平之秋七月丁酉賑四川饑八月癸亥陸完討賊
劉七等平之九月乙酉陳金討華林賊平之內申賜義子一
百二十七人國姓冬十月甲子增建豹房費鉅萬是月免河
南江西浙江紹興府被災寇者稅糧十一月壬申都督僉事
時源爲平賊將軍充總兵官會四川總制彭澤討四川賊丁
亥留大同宣府遼東軍於京營號外四家軍李東陽諫阻以
中旨行之十二月丁卯李東陽致仕是月免兩畿山東山西
陝西被災寇者稅糧是年朝鮮安南日本哈密俱入貢
八年春正月癸酉右副都御史俞諫提督江西軍務代陳金
討賊乙酉邊將江彬許泰分領京營尋賜國姓癸巳以大同
寇警戶部侍郎叢蘭僉都御史陳玉巡視邊關二月丙午以

平賊功封谷大用弟大亮陸閭姪永皆爲伯三月甲午以旱
勅羣臣修省夏四月乙丑彭澤斬賊首廖麻子於劍州五月
辛巳寇入大同邊兵屢敗仇鉞充總兵官提督軍務率京軍
禦之六月戊戌河決黃陵岡乙卯俞諫破賊於裴源山八月
丁酉免蘇松諸府被水者稅糧九月甲戌俞諫破賊於桃源
冬十月丁未俞諫破賊於東鄉江西賊平十二月甲辰南京
刑部侍郎鄧璋賑江西饑是年朝鮮哈密俱入貢
九年春正月壬午以乾清宮災勅羣臣修省極言時政缺失
二月庚子微行至教坊司丙午掌詹事府禮部尙書靳貴爲
禮部尙書兼文淵閣大學士入閣預機務癸丑彭澤討四川
賊平之夏四月丁酉再復寧府護衛軍并屯田與之五月乙

丑費宏致仕巳丑以上魯番據哈密右都御史彭澤總督軍務率延綏寧夏固原軍駐甘肅禦之六月乙卯開雲南銀礦以鎮守太監梁裕董其事秋七月乙丑小王子犯宣大命張永提督軍務都督白玉充總兵官率京軍與總制戶部右侍郎兼右僉都御史叢蘭禦之丙子小王子大掠近邊八月辛卯朔日有食之辛丑寇犯白羊口浮圖峪巳未犯寧武關忻州定襄寧化九月壬戌犯宣府蔚州庚午帝狎虎被傷不視朝者閱月翰林院編修王思疏諫留中謫廣東饒平驛丞冬十月巳酉工部侍郎劉丙採木川湖十二月甲寅加兩畿浙江賦一百萬兩以建乾清宮故是年安南朝鮮哈密烏思藏俱入貢

十年春正月癸亥薄暮享太廟戊辰薄暮祀天南郊時帝與羣小弄兵走馬微行朝政多廢廷臣交章切諫皆不聽丙子寇犯潮河川二月乙卯犯延綏寧夏三月壬申楊廷和以憂去夏閏四月辛酉吏部尙書楊一清兼武英殿大學士入閣預機務秋八月丙寅寇犯花馬池入固原冬十二月癸丑朔日有食之巳卯免廬鳳淮揚四府及徐州被災者秋糧是年琉球安南朝鮮哈密撒馬兒罕俱入貢

十一年春二月壬申太監張忠都督許泰分領東西兩官廳都督江彬兼領之帝又作中軍自領之大闕西苑名曰過錦夏四月戊寅發帑賑河南饑五月巳丑賑陝西饑庚寅土魯番以哈密城來歸甲辰錄自宮男子三千四百六十八人充

海戶六月丁巳太監浦智往蘇杭織造秋七月乙未寇犯薊
鎮白羊口都督劉暉充總兵官率兩官廳軍禦之丙午工部
侍郎趙璜俞琳飭畿內武備八月丁巳左都御史彭澤提督
東西二路邊關成國公朱輔充總兵官共禦寇戊午寇犯宛
平境庚申賜京縣被寇者人米二石甲子楊一清致仕丁丑
掌詹事府禮部尙書蔣冕爲禮部尙書兼文淵閣大學士入
閣預機務是年朝鮮琉球天方俱入貢

十二年春正月己丑祀天南郊遂獵南海子夜半乃還內閣
府部大臣及科道官交章諫阻不報西北行邊自此始壬寅
土魯番復據哈密犯肅州三月戊戌以淮浙四川河東鹽課
充陝西織造費夏四月壬子靳貴致仕丙辰甘肅副總兵鄭

廉等敗土魯番於瓜州五月丙子禮部尙書毛紀兼東閣大
學士入閣預機務秋八月甲辰微服如昌平乙巳梁儲蔣冕
毛紀追及之沙河疏請回蹕不納己酉將出居庸關守關御
史張欽闔關門以拒使者乃還丙辰至自昌平戊午夜御奉
天殿視朝癸亥副都御史吳廷舉賑湖廣饑丙寅微服出居
庸關辛未如宣府命谷大用守關毋出京朝官九月甲戌駐
蹕宣府營鎮國府第居之辛卯河決城武壬辰駐蹕陽和自
稱總督軍務威武大將軍總兵官一切軍政皆以大將軍鈞
帖行之庚子發帑一百萬兩備行在賞勞冬十月癸卯駐蹕
順聖川甲辰寇犯陽和掠應州親督諸軍禦之連戰五日乘
輿幾陷戊申寇引去乃還駐蹕大同十一月丁亥楊廷和復

入內閣戊子車駕還宣府十二月癸亥內閣九卿至居庸關請回蹕有禁不得出關而還閏月丁亥迎春宣府備設諸戲是年琉球朝鮮烏思藏俱入貢

十三年春正月丙午至自宣府百官具綵帳羊酒郊迎帝御帳殿閣臣奉觴稱賀時南郊當致齋以初至不及舉庚戌祀天南郊遂獵南海子辛酉復如宣府是月賑兩畿水災廩流民瘞死者二月己卯太皇太后崩壬午至自宣府三月戊辰如昌平夏四月己巳謁大陵遂獵密雲五月己亥朔日有食之帝駐蹕喜峰口戊申至自喜峰口六月庚辰梓宮發京師帝戎服馳馬以從甲申葬孝貞純皇后於茂陵乙酉至自昌平秋七月己亥將如塞上自稱總督軍務威武大將軍總兵

官朱壽命閣臣撰勅內閣九卿科道竝至左順門泣諫不納錄應州功陞廕及賞者五萬六千四百餘人丙午發京師丁未度居庸關仍戒守者毋出京朝官遂歷懷來保安諸城堡駐蹕宣府己酉提督南贛汀漳軍務左僉都御史王守仁討橫水桶岡泃頭諸賊悉平之八月乙酉如大同九月庚子次偏頭關癸丑降手勅曰總督軍務威武大將軍總兵官朱壽親統六師肅清邊境特加封鎮國公歲支祿米五千石吏部如勅奉行復內批令於後軍都督府帶俸甲寅封朱彬朱泰爲伯冬十月戊辰渡河西幸己卯次榆林十一月庚子調西官廳勇士四衛營兵赴宣大壬子次綏德州幸總兵官戴欽第納其女十二月戊寅歷米脂綏德州幸石州文水戊子

次太原納樂工妻劉氏是年琉球朝鮮天方瓦剌俱入貢
十四年春正月壬子還宣府二月壬申至自宣府丁丑祀天
南郊遂獵南海子己丑復降手勅諭吏部曰鎮國公朱壽宜
加太師又諭禮部曰總督軍務威武大將軍總兵官太師鎮
國公朱壽今往兩畿山東祀神祈福三月癸丑以諫南巡下
兵部郎中黃鞏等六人於錦衣衛獄罰翰林修撰舒芬等百
有七人跪午門五日杖殺金吾衛指揮僉事張英乙卯鞏鞏
等六人跪午門下大理寺正周叙等十人於錦衣衛獄丙辰
下行人司副余廷瓚等二十人工部主事林大輅等三人於
錦衣衛獄尋令梏跪午門如鞏等戊午杖芬等百有七人於
闕下是日風霾晝晦夏四月戊寅杖黃鞏等三十九人於闕

下先後死者十一人五月己亥詔山東山西陝西河南湖廣
流民歸業者官給廩食廬舍牛種復其賦五年六月丙子寧
王宸濠反巡撫江西右副都御史孫燧南昌兵備副使許逵
死之戊寅陷南康己卯陷九江秋七月甲辰傳旨親征是日
復傳旨宸濠悖逆天道將犯南京其令總督軍務威武大將
軍總兵官太師鎮國公朱壽親統邊兵討之安邊伯朱泰爲
威武副將軍率師先發丙午宸濠犯安慶不克辛亥提督南
贛汀漳軍務右副都御史王守仁率兵攻南昌克其城丁巳
守仁敗宸濠於樵舍禽之八月戊辰以南征告郊廟癸未發
京師梁儲蔣冕扈從丁亥次涿州得王守仁捷奏祕不發九
月癸丑次臨清召劉姬不至自趨張家灣載之俱南冬十一

月乙巳漁清江浦壬子長至幸中官張陽第受朝賀巳未次寶應漁汜光湖十二月辛酉次揚州大索處女寡婦壬戌獵城西戊寅閱女伎於揚州癸未漁新閘甲申幸儀真民黃昌本家闔太監張雄所選伎送其半於御舟丙戌至南京是年朝鮮撒馬兒罕俱入貢

十五年春正月丁酉迎春於南京夏六月丁巳宿牛首山諸軍夜驚左右皆大擾久之乃定秋七月寇犯宣府大同閏八月丁酉發南京壬寅漁江口九月丙寅至清江浦復幸張陽第巳巳漁積水池舟覆溺焉左右掖之出遂得疾冬十月庚戌至通州十一月庚申治交通宸濠者罪執吏部尙書陸完赴行在十二月巳丑賜宸濠死甲午還京師帝戎服乘馬入

遣官以凱旋告郊廟社稷丁酉祀天南郊初獻疾作不克終禮臥齋宮翼日乃還是年朝鮮琉球占城佛郎機俱入貢十六年春正月巳未孝貞純皇后耐廟疾甚不克行禮二月癸巳廣西副總兵張祐討古田叛蠻平之巳亥雲南巡撫右副都御史何孟春討彌勒州叛苗平之三月癸丑朔日有食之庚申改西官廳爲威武團營乙丑大漸諭太監陳敬蘇進曰朕疾不可爲矣其語司禮監官以朕意達皇太后天下事重與閣臣審處之前事皆由朕誤非汝曹所能預也丙寅崩於豹房年三十有一是日楊廷和請於皇太后傳遺旨罷威武團營造各邊軍還革京城內外皇店縱遣豹房番僧及教坊司樂人戊辰頒遺詔釋諸司繫囚還四方所獻婦女停不

